

Южин О'НИЛ

(Америка ёзувчиси, 1888–1953)

ҚАЙРАГОЧ СОЯСИДА

Уч пардали пьеса

ИШТИРОК ЭТУВЧИЛАР:

ЭФРАИМ КЭБОТ
СИМЕОН
ПИТЕР
ЭБИН
АББИ

} унинг ўғиллари

КИЗ
СКРИПКАЧИ
ПОЛИЦИЯ БОШЛИГИ
ҚЎШНИ ФЕРМЕРЛАР

БИРИНЧИ ПАРДА

БИРИНЧИ КЎРИНИШ

Эшик очилиб, Эбин пайдо бўлади, у айвондан тушиб тўхтайди-да, ўнг томондаги йўлга қарайди. Қўлидаги қўнгироқни қаттиқ-қаттиқ чалади. Кейин чалишдан тўхтаб, бошини кўтарида ва қандайдир бетайин ҳаловатда узоқ осмонга тикилиб туради.

Эбин. Тавба, мунча чиройли бу!

Бу вақт дала ишларидан Симеон билан Питер қайтади. Улар ўтгай укаларидан анча катта — Симеон ўттиз тўққизда, Питер ўттиз еттида.

Симеон (*ҳайрат билан*). Шафақнинг яллигланишини қара!

Питер. Ҳа, кўраяпман.

Симеон (*ўз ўллари билан*). Ўн саккиз йил ўтиб кетибди-я.

Питер. Нима?

Симеон. Хотинимнинг ўлганига ўн саккиз йил бўлибди.

Питер. Ҳа-а. Эсимдан ҳам чиқипти.

Симеон. Мен хаёлимдан чиқаролмаяпман, эслаганим эслаган. Юрагинг эзилиб кетади. Соchlари ёдингдами, худди отнинг думидай узун, тилладай товланарди.

Питер (*бепарво*). Ҳа, ўлиб кетди. (*Жимлик.*) Лекин тилла деганинг у ёқда, Сим, гарбда зўр товланади.

Симеон (*ҳамон шафаққа маҳлиё*). Алангланишини қара!

Питер. Бу — бир ниманинг аломати! (*Руҳланиб кетиб.*) Тилла бу! Кун ботишда, гарбда. Олтин дарвоза. Калифорния томонда... Фарбнинг олтин конлари, Сим!

Симеон (*у ҳам руҳланиб кетади*). Ҳа, у ерларда тилла шундоқ оёқ остида ётади, дейишади, истаганингча супуриб олавер! Бамисоли Сулаймон пайтамбарнинг ҳазинаси!

Иккови ҳам яна анчагача осмонга тикилиб туради, кейин бош эгиб қолишади.

П и т е р (*рухсиз*). Бизнинг ерлар бўлса — чағир тош: ер ҳам бир, манави девор ҳам бир. Сен билан биз унга бир умр қора тер тўқдик. Ким учун? Шу одам учун. Нима учун? У бизни мана шу тош деворга тириклай кўмсин учун!

С и м е о н. Неча йиллардан бери бор кучимизни сарфлаб, яғиrimiz чиққунча ишлаймиз! Бу лаънати ердан биз нима олдик? (*Алам билан ер тениб.*) Ҳаммаси шу одамнинг бойлик орттириши учун!

П и т е р. Агар шунча меҳнатни Калифорния ерларига сарфлаганимизда борми — тувагимизгача тилла бўлиб кетарди!

Хаёлга ботиб ўтирадилар. Эбин ошхона деразасидан бош суқиб қулоқ солади.

С и м е о н. Менга қара, балки у, ҳалиги... ўлиб-нетиб қолар-а?

П и т е р. Қайдам.

С и м е о н. Эҳтимол у ҳозироқ... бирон жойда...

П и т е р. Билиб бўлмайди...

С и м е о н. Икки ойдан бери дом-дараги йўқ-ку.

П и т е р. Худди мана шундай оқшомда уйдан чиқиб кетганди. Бирдан шошиб отланди-ю, тўппа-тўғри фарбга қараб... Бу ерда бир гап бор... Қишлоқдан нари ҳеч қаҷон, ҳеч қаерга борган эмасди. Ўттиз йил бўлгандир-ов, мана шу фермадан чиқмаганига ҳам. Эбиннинг онасига уйланганидан бери шу ерда эди. (*Бир нафас жисмикдан кейин, алам билан.*) Бордию уни жинни деб эълон қиласак-чи? Суд ҳам бизни қўлларди, ўрай агар.

С и м е о н. Э, судья-пудянгнинг барини қўлга олади. Унинг жиннилигига ҳеч ким ишонмайди ҳам. Йўқ, ўлишини кутишга тўғри келади, оғайни.

Э б и н (*захарханда билан*). Ота рози — худо рози, деганлар.

Симеон билан Питер сесканиб у томон қайрилади.

(*Аламли кулади. Кейин хўмрайиб.*) Мен ҳам эртаю кеч унинг ўлимини тилаб, худодан илтижо қилиб ётибман.

Симеон билан Питер ҳайратда тикилиб туришибди.

(*Ҳеч гап бўлмагандай.*) Овқатларинг тайёр.

С и м е о н ва **П и т е р** (*бирга*). Э-э-эҳ!

Э б и н (*шафаққа тикилиб*). Тавба, ловуллаб ёниши кўзни олади-я.

С и м е о н ва **П и т е р** (*бирга*). Тилла бор у ёқда. Фарб дейдилар.

Э б и н. Фарбинг қаер?

С и м е о н ва **П и т е р** (*бирга*). Калифорния!

Э б и н. Ҳа-а. Ҳа, майли. Овқат совияпти. (*Ошхонага кириб кетади.*)

С и м е о н (*қуруқшаган лабларини ялаб*). Қорин очди.

П и т е р. Қоқланган гўшт иси келяпти.

С и м е о н. Чўчқа гўшти.

П и т е р. Чўчқа бўлса яна ҳам яхши!

ИККИНЧИ КЎРИНИШ

Шафақ сўниб, қош қорая бошлади.

Ошхонада таҳтадан ясалган стол, унда учта коса, шам, бир буханка нон, кувачада сув.

С и м е о н билан **П и т е р** лорсиллаб кириб, курсиларга оғир чўқадилар. **Э б и н** плита устидан сувда пишган картошқа билан чўчқа гўштини олиб, столга қўяди-да, ўзи ҳам ўтиради. Учовлон гап-сўзсиз овқатланадилар.

С и м е о н (*бехосдан Эбинга қараб*). Менга қара! Сенинг отамиз ҳақида ундай дейишинг яхши эмас.

П и т е р . Бу — адолатсизлик.
 Э б и н . Нимани айтаяпсизлар?
 С и м е о н . Унинг ўлимини тилашингни-да.
 Э б и н . Ўзларинг ҳам тилаяпсизлар-ку?

Жимлик.

П и т е р . Менга қара! У — ўз отамиз, ахир!
 Э б и н (*газаб билан*). У менга ота эмас!
 С и м е о н . Сен, масалан, ўз онанг ҳақида шундай гапиришимизга йўл
 қўярмидинг?

Афтини хунук буриширади.

Э б и н (*ранги ўчиб*). Унинг менга ҳеч қандай алоқаси йўқ, менинг ҳам
 унга алоқам йўқ.

П и т е р . Сабр қил, унинг ёшини яшаганингда биласан.
 Э б и н . Мен онамга тортганман! Томчи қонимгача.

Симеон ва Питер унга бепарво синчковлик билан тикиладилар.

П и т е р (*бир нимани эслаб*). Тўғри, онанг меҳрибон эди, менга ҳам, Си-
 меонга ҳам. Ўтгай бўлишига қарамасдан.

С и м е о н . У ҳаммага меҳрибон эди.

Э б и н (*ўрнидан туриб қизаринқираб, акаларига бесўнақай таъзим қиласди*).
 Яхши гап билан эслаганларинг учун қуллуқ. Катта раҳмат сизларга. (*Ўтира-
 ди*)

П и т е р (*жимликдан сўнг*). У дадамизга ҳам меҳрибон эди.

Э б и н (*кескин*). Миннатдорлик эвазига гўрга тиқди-да!

С и м е о н (*файласуфона*). Дунёда одамни одам ўлдирмайди. Вазият ўлди-
 ради. Билиб қўй!

Э б и н . Чол унинг жонини суфуриб олди.

П и т е р . У ўзи ҳам жони чиққунча ишлайди. Сени ҳам, Симеонни ҳам,
 мени ҳам жонимиз чиққунча ишлатади. Шунинг учун, ҳали тирик эканмиз...

С и м е о н . Уни бунга қандайдир бир куч мажбур қиласди.

Э б и н . Бир кун эмас бир кун ҳаммаси учун жавоб беради! (*Хунук илжа-
 иб*.) Қизиқ, уни мажбур қиласиган ўша «куч» нима экан-а?

С и м е о н . Тушуниш қийин.

Э б и н . Балки сизларни Калифорнияга чорлаётган ўша кучдир?

Симеон ва Питер унга ҳайрат билан тикиладилар.

Лекин сизлар ҳеч қаёққа кетолмайсизлар. Олтин тоғлари чараклаб имлаб
 турса ҳам.

П и т е р . Буни ҳали кўрамиз!

Э б и н . Йўлга пулни қаёқдан оласанлар?

П и т е р . Биз пиёда ҳам кетаверамиз. Мана бу лаънати фермада босган
 қадамларимизни ҳисобласа, ойга етарди!

Э б и н . У йўлларда ҳиндулар бош суюнгизни қозиқда қуритишади.

С и м е о н (*хунук тиржайиб*). Биз ўзимиз қуритамиз ҳар қанақа каллани!

Эбин (*атайлаб жигларига тегиши учун*). Ҳеч қаёққа кетмайсизлар, би-
 ламан, сизлар унинг ўлимини кутасизлар, мол-мулкини бўлишиб олиш
 учун!

С и м е о н (*сал жим тургач*). Бунга бизнинг ҳаққимиз бор.

П и т е р. Бу рўзғорнинг учдан икки қисми бизники.

Э б и н (сапчиб туриб). Бу ерда ҳеч қанақа улушларинг йўқ. Бу ферма менинг онамга қарашли эди. Онамдан тортиб олган. Онам ўлиб кетди, энди рўзғор менини.

Симеон. Сен бу гапингни чолга айтиб кўр. Гаров ўйнайман — эшитса, ичаги узилиб ўлади. (*Кулади; унинг кулгиси итнинг акиллашига ўхшаб кетади.*)

П и т е р (акасига ўхшатиб кулади). Ҳа-ҳа-ҳав!

Симеон. Бизларда нима қасдинг бор-а, Эбин? Кўзларингдан ёвуз ниятинг кўриниб турибди, кўпдан сезиб юраман.

П и т е р. Ҳа, ҳа, мен ҳам сезиб юраман.

Э б и н. Бўлса бордир. (*Кескин.*) У онамни яғир эшақдай ишлатганида сенлар бир чеккага чиқиб томоша қилардинглар. Шўрликни ҳимоя қилиш учун бир оғиз сўз топмагансанлар. У эса сен кўрнамакларга меҳрибон эди...

Симеон ва Питер унга анқайиб қараб қоладилар.

Симеон (анчадан кейин). Ахир, Эбин, молларни субориш керак эдими!

Питер. Том ёпиш-чи?

Симеон. Ер ҳайдаш-чи?

Питер. Ем-хашак тўплаш!

Симеон. Гўнг ташиш-чи?

Питер. Ўташ!

Симеон. Ўтин ёриш!

Питер. Сигир соғиш!

Эбин (бақириб). Девор уриш... тош ташиш... Юракларингиз тошга айлангунча ишлаш! Ишлаш!

Симеон. Ҳа, бирорларнинг ишига бош қўшгали фурсатимиз йўқ эди.

Питер. Онанг ўлганида сен ўзинг ҳам катта бўлиб қолган эдинг — хўш, нега кўл қовуштириб ўтирединг?

Эбин. Мен ҳали оқ-қорани ажратолмасдим. Кейин тушундим ҳаммасини, онам ўлгандан кейин. (*Пауза.*) Энди тасаввур қилаяпман шўрликнинг аҳволини, барча кўргиликлар ўз бошимга тушганда. Кечаси ҳам, кундузи ҳам, нимаики иш қилсан — шундоқ ёнимга келиб, кўз ўнгимда турди. Картошка қовурганимда ҳам, сомса ёпганимда, ўчоққа ўт ёққанимда ҳам — келиб менга ёрдам берәётганга ўхшайди. Шундоқ ўчоқ бошида ўтиради, кўзлари тутундан қизариб... худди ҳаёт вақтидагидек қон-қора қақшаб йиғлайди. Гўрида тинч ётолмайди шекилли-да, бекорчиликка ўрганмаган.

Симеон. Ҳеч қачон нолимасди, бояқиши.

Эбин. Силласи қуриб кетар эди. Нолигани вақт қани! Чол шу аҳволга соларди уни! (*Кескин.*) Аммо-лекин бир куни юзига соламан ҳаммасини. Шартта, бақириб айтаман. Онам ҳеч бўлмаса гўрида ором топиши керак! (*Ўтириб, жим қолади.*)

Симеон ва Питер унга ошкора қизиқиши билан қараб қоладилар.

Питер (жимликдан кейин). Сим, сенингча у нима жин уриб жўнаб қолди-а?

Симеон. Ким билади дейсан? Бир маҳал даладан қайтсан — аравада дарвозадан чиқиб келяпти. От ювиб-таралган, ўзи ҳам башанг, қамчи ўйнатиб ўтди ёнимдан. Яхши эсимда — баҳор эди, экишни тугатиб қайтаётувдим. Тикка гарбга ҳайдади, оловланиб турган уфқа қараб. «Дада, қаёқقا?» десам, тизгинни сал тортиди-ю, мен томонга қайрилиб қаради, кўзлари илондай

совуқ йилтиллаб кетди. Бир күнглим, маст бўлса керак, деб ҳам ўйладим. «Қайтиб келгунимча қимир этмай ўтиринглар!» — деб қичқириди.

Питер. Калифорнияга қараб жуфтакни ростлаш ниятимизни билса борми, ҳанг-манг бўлиб қоларди-да.

Симеон. Мен унга ҳеч нима демадим ўшанда. У бўлса узоқдан фалати, ҳорғин бир қарашиб қилди-да, яна қичқириди: «Ҳар куни товуқларнинг қитқити-ю, хўрз қичқиригидан қулоқларим тиниб кетди. Моллар бесаранжом, ниманидир кутади. Ҳамма нарса жонланиб қолди, менинг бунга ортиқ тоқатим йўқ. Баҳор кирса жонимга шайтон оралайди. Яқин орада ўтинга кесиладиган қари ёнгоқдайман». Менинг кўз қарашибимда умид учқунини кўрдими, яна қўшиб қўйди: «Лекин шошманглар, мен ҳали тирикман, юз йил яшашибга қасам ичдим, сенларнинг баҳтингга қарши — яшайман ҳали. Ҳозир эса, авлиёлардай, худойимнинг баҳорги неъматларини татигани кетяпман. Ишни тўхтатманглар», деди-ю, ниманидир хиргойи қилиб жўнаб қолди. Ўшанда маст эмаслигини билсан, йўлдан қайтарган бўлардим.

Эбин (калака қилиб). Йўлдан қайтарармиш! Рўпара бўлсанг, жонингни ҳовучлаб турардинг. У иккалангдан ҳам кучли.

Питер. Ўзинг-чи? Ё сен жуда паҳлавонмисан?

Эбин. Шошмай тур — бўламан. Кундан-кун кучга тўлаётганимни сезиб турибман, бир кун эмас бир кун ўзини кўрсатади бу куч. (*Ўрнидан туриб, пальтосини, шляпасини кияди.*) Мен ҳозир. Ҳозир қайтаман.

Питер. Қишлоққами?

Симеон. Миннининг ёнига дегин?

Эбин (ӯчакишиб). Ҳа.

Питер (масхараомуз). Зап топибсан.

Симеон (Питерга). Эшитдинг-ку: кучга тўляпман дейди! Кучга эмас, шаҳватга тўлибсан.

Эбин. Минни — дилбар хотин!

Питер. Ҳа, дилбар эди. Йигирма йилча аввал.

Симеон. Юзига шунча упа-элигу бўёқ суркаса, ҳар қанақа кампир ҳам чиройли бўлади. Янглишмасам, қирқларга боргандир?

Эбин. Қирқ қаёқда!

Питер. Қирқ бўлмаса ҳам, ўша атрофда.

Эбин (алам билан). Сен қаёқдан билақолдинг?

Питер. Ҳамма билади уни, эътиборинг учун, Сим ҳам билади, кейин эса мен ҳам билганман...

Симеон. Дадамиз ҳам сенга у-бу айтиб бериши мумкин. У биринчи эди...

Эбин. Дадамиз-а?

Симеон (масхара қилиб). Ҳа-да! Биз ҳамма жиҳатдан дадамизнинг меросхўрларимиз!

Эбин (ӯзини зўрга босиб). Ўтиб ҳам кетганмиз десанг-чи! (*Эшикни тепиб очади.*) Ҳозир кўрсатаман у манжалақига!

Симеон (Питерга кўз қисиб). Уйига етгунча бу ниятингдан қайтасан. Кўрмаяпсанми — қанақа сўлим кеча! Ишқ ҳаловатидан бошқа ҳамма нарса калладан чиқиб кетади.

Питер. Қайтади ниятидан, турган гап.

Симеон билан Питер тиржайиб куладилар. Эбин эшикни тарақлатиб чиқиб кетади. Айвондан тушиб, муюлишдан ўтгач, дарвоза ёнида тўхтаб қолади, осмонга тикилади.

Симеон. Чолнинг фирт ўзи!

Питер. Қуйиб қўйгандай!

Симеон. Булар бир-бирини ғажиб ташлайди.

Питер. Ҳа! (*Пауза. Ҳазин.*) Биз, эҳтимол, бирор йилдан сўнг Калифорнияда бўлармиз.

Симеон. Эҳтимол. (*Кершишб ўрнидан туради.*) Кетдик, ётиш керак. (*Шамни ўчиради.*)

Эбин (қўлини осмонга чўзиб). Тавба, мунча қўп бу юлдузлар! Анавиниси меники бўлса керак? Буниси Симеонники, наригиси Питерники. Ҳов олисда — Минниники. Ҳаммамиз бир коинотдамиз. Чиндан ҳам, ҳозир бориб уни қучоғимга олақолсалм-чи? У мана шу тундек майин, сеҳрли кўzlари юлдуздай ёнади, лаблари ўтли, қўллари юмшоқ, вужудидан шудгор ҳиди келади. Худо, уни кечир, у гўзал, у дилбар! Бошқа ишларию гуноҳлари билан менинг нима ишим бор! Ё тангри, ўзинг айт, ҳар биримиз сенинг олдингда гуноҳкор эмасмизми?

Гуноҳ дегани ахир шундай лаззатли...

УЧИНЧИ КЎРИНИШ

Тонголди, гира-шира пайт. Чапда Эбин пайдо бўлади. Кимдандир жиркангандай, тўнғиллаганча айвон томон юради.

Эбин. Лаънати қари така! (*Уйга киргани, зинадан чиққани, акаларининг ётоқхонасига яқинлашгани эшишилади.*) Туринглар-да, энди!

Эшик ланг очилиб, Эбин киради, қўлида шам. Қия шифтли хона ёришади. Шифт шундай пастки, орқа девор ёнидагина тик туриш мумкин. Олдинда Симеон билан Питернинг катта тўшаги. Орқада Эбиннинг жойи.

Эбин (*гўллик билан тиржайиб туради*). Бу мен.

Питер. Каллаи саҳарда нима қилиб...

Эбин. Сенларга бир қулоқ янгилик олиб келдим.

Симеон (*жахли чиқиб*). Эрталаб айтсанг ҳам бўларди, ёрилмасдинг.

Эбин. Тонг отган! Яхиси — гапга қулоқ солинглар! У яна ўйланиб олибди!

Симеон ва **Питер** (*баравар*). Ким? Дадамизми?

Эбин. Ўттиз бешларга борган бир жононни топиби дейишади. Кетворган эмиш.

Симеон (*ҳайратда*). Фирт ёлғон!

Питер. Ким сенга етқиза қолди?

Симеон. Лақиллатишган.

Эбин. Мени лақиллатиб бўпти! Бутун қишлоқда дув-дув гап! Нью-Доверга борган бир руҳоний топиб келди бу гапни. Янги ойимча онамиз ўша ерлик эканлар.

Питер (*ҳанг-манг бўлиб*). Ана холос!

Симеон (*шу оҳангда*). Ана холос!

Эбин (*каравотга ўтириб, нафрат билан*). Уни дўзахи десам ишонмайлизлар! Бизга ўчакишиб қиласпти, лаънати қари эшшак!

Питер (*ўйчан*). Ҳа... Энди мол-мулк ўша жононга ўтиб кетади.

Симеон. Турган гап. (*Хўмрайиб*.) Нима ҳам дердик. Ундай бўлса...

Питер (*шошиб*). Худонинг ўзи йўл кўрсатиб турибди, Сим. Калифорния! Бу ерда қиладиган ишимиз қолмади.

Симеон. Мен ҳам шуни ўйлаб турибман. (*Қатъий*.) Шу бугуноқ жўнаб кетсанк нима дейсан? Чўзигб нима қиласмиз!

Питер. Мен розиман.

Эбин. Пиёда кетмоқчимисизлар?

Симеон (*калака қилиб*). Агар қанотларингни бериб турсанг, жон деб учуб кетардик.

Э б и н . Энг яхшиси — пароходда кетинглар. (*Чүнтагидан бир варақ гижим қоғоз олади.*) Мана бунга имзо чекинглар-да, пароходга ўтириб, жўнайверинглар. Фарбга отдана қолишса деб, ҳар эҳтимолга қарши аллақачон тайёрлаб қўйган эдим. Рўзгордан тегишли ўз улушларингни менга сотишга рози бўлсанглар, ҳар биринг уч юз доллардан пул оласан. Қани?

Симеон билан Питер ишонқирамай қоғозга қараб қолади. Жимлик.

Симеон (*гаранг*). Ахир у уйланиб олган бўлса, бу рўзфор...

Питер . Тўхта, аввал бу айтсин — мунча пулни қаёқдан олади?

Э б и н (*кинояомуз*). Пулнинг бекитилган жойини биз биламиз-да. Онам айтиб кетган. У биларди пулнинг турадиган кавагини. Чол бу пулларни онамдан яширади, лекин пуллар онамники, унинг фермасидан чиққан. Энди бўлса у менинг ҳаққим!

Питер . Хўш-хўш, қаёқда экан ўша кавак?

Э б и н (*ўчакишиб*). Сенлар тополмайдиган жойда, ҳа!

Пауза. Шубҳа билан бир-бирларига қарашади.

Хўш, нима дейсанлар?

Симеон . Қайдам.

Питер . Қайдам.

Симеон (*деразага қараб*). Тонг ёришяпти.

Питер . Ўчоққа ўт қала, Эбин.

Симеон . У-бу бер, қорин оч.

Э б и н (*гўё меҳри товланиб*). Ҳозир муҳайё қиласиз. Оч қорин билан Калифорнияга етиб бўладими! (*Эшик томон юаркан, маънодор қилиб қўшиб қўяди.*) Лекин пиёда эмас, пароходда кетишларинг мумкин. Бу ўзларингга боғлиқ. (*Остонада тўхтаб, жавоб кутади.*)

Акалари унга қараб туришади.

Симеон (*бирдан шубҳаланиб*). Менга қара, кечаси қаёққа гумдон бўлдинг?

Э б и н (*истеҳзо билан*). Минниникида эдим! (*Салмоқлаб.*) Аввал йўлда, бир кучиб ўпаман-у, қайтиб келаман, деб хаёл сури-и-иб бордим, кейин бу ерда кеча дадамиз билан иккаласи ҳақида гапиргандарингни эсладим-у, фазабим тошиб кетди: тўхтаб тур, Минни, кўрсатиб қўяман сенга! — дедим. Қишлоққа етиб борувдимки, ҳалиги янгилик қулогимга чалиниб қолди. Эшитдим-у, телбалигим тутиб, Миннининг олдига югурдим. (*Жим қолади, кейин қатъиятсиз, лекин дона-дона қилиб.*) Кўрди-му... Ўпмадим, калтакламадим ҳам... Аммамнинг бузогидай ўкириб йиғладим, сўқиндим. Фирт жиннига ўхшардим... Минни қўрқиб қалтираб қолди... Шунда қучофимга олсам, шилқ этиб тушди. (*Магрур.*) У менини. Сенларники ҳам бўлган бўлиши мумкин, лекин энди менини.

Симеон (*қуруқроқ*). Ишқинг тушдими, нима бало?

Э б и н (*беписанд*). Ишқ?! Кўзим учиб тургани йўқ.

Питер (*Симеонга қўз қисиб*). Назаримда бу ҳам уйланмоқчи.

Симеон . Майли-да, Минни ҳамма учун ёппасига вафодор хотин бўлади!

Симеон билан Питер тиржайиб кулади.

Э б и н . Менга нима, ёниб ёпишиб турса бўлгани. Муҳими шуки, ҳозир у тамом менини. (*Кетаётуб, останада тўхтайди.*) Сенлар ўйлаганчалик эмас у, ундан баттарлари бўлади, гаров ўйнайман. Мана, чол етаклаб келадиган говмишни ҳам кўрамиз. Минни ип эшолмай қолади ҳали унинг олдида, мени айтди дейсанлар.

Симеон (бирдан). Борди-ю, сен уни ҳам... а?

Питер. Ҳа-я! (Жирканч тиржаяди.)

Эбин (күнгли айнигандай туфуради). Тфу! Уними... шу ерда... чолнинг қўйнида ағанаб... онамнинг мол-мулкини ўйлаётган жойида-я? Биронта ифлос чўчқани ёки заҳарли илонни бағримга босганим яхши эмасми? (Кетади.)

Симеон ва Питер шубҳа билан қараб қоладилар, қадамига қулоқ соладилар. Пауза.

Питер. Ўчиққа ўт ёёққани кетди.

Симеон. Менга қолса, Калифорнияга қараб жуфтакни ростлаш тузук эди-ю, лекин...

Питер. Бу Миннининг ўйлаб топган ҳийласи эмасмикин? Буни ҳам ўша ўргатган бўлса-чи.

Симеон. Чолнинг уйланганлиги — тўқилган гап бўлиши ҳам мумкин. Яхиси, жиндек сабр қилиб, ўша жононни ҳам кўрайлик.

Питер. Ўз кўзимиз билан кўрмай туриб, қофозга имзо ҳам чекмаймиз.

Симеон. Бунинг пуллари масаласини ҳам ҳали бир текшириб кўриш керак. (Жилмайиб.) Агар чол чиндан ҳам биронтасини етаклаб келса, бор рўзгорини Эбинга пуллаб қочамиз.

Питер. Сабр қилайлик-чи — кўрамиз. (Бирдан газаби тошиб.) Қайтиб келгунича қўлимизни совуқ сувга урмаймиз! Истаса, ана, Эбин ишлайверсин эшакдай. Еймиз, ичамиз, айш қиламиз. Рўзгорига ўт тушиб, кули кўкка совурилмайдими!

Симеон. Айш қилсак ҳаддимиз сиғади! Биз ҳам бир бойвачча бўлайлик. То нонуштагача ағанаб ётаман.

Питер. Даствурхон тузашмагунча турмаймиз.

Симеон (яна жим тургач, ўйчан). Янги ойимча онамиз қанақа эканлар-а? Назарингда қандай, Эбин айтганича бормикин?

Питер. Бўлиши мумкин!

Симеон. У ҳолда — юбка кийган бир шайтон бўлиб чиқсин, омин! Токи чол тезроқ жонидан тўйиб, жиндек ором олиш учун дўзахни қидириб қолсин!

Питер (завқ билан). Омин, шундай бўлсин.

Симеон (отасига тақлид қилиб). «Ҳозир эса, авлиёлардай, худойимнинг баҳорги неъматини татигани кетяпман». Баҳорги неъмати нима экан десам... Ўлай агар, у ўшандәёқ билган нима учун кетаётганини, сассиқ хотинбоз...

ТЎРТИНЧИ КЎРИНИШ

Ошхона. Тонг ёришиб келяпти. Столда шам ёниб туриди. Симеон билан Питер нонушта қилишяпти. Эбин овқатга қўл урмай, хаёл суриб ўтирибди.

Питер (Эбинга кўз ташлаб, гаш). Ўйласанг-ўйламасанг — нима фойда?!

Симеон (калака қилиб). Кучини қаёққа қўйишни билмаяпти.

Питер. Минни, нима, кўз очиб кўрганингми?

Эбин (жаҳл билан). Ишинг бўлмасин! (Пауза.) Мен чолни ўйлајпман. Назаримда, ҳозир келиб қолади. Безгак тутишини кутгандек, сезяпман.

Питер. Каллаи саҳарлаб келармиди.

Симеон. Келса келаверади-да. Бизнинг нима қилаётганимизни кўриш учун тўсатдан кириб келади.

Питер (беихтиёр ўриидан туриб). Кетиш керак.

Унинг кетидан Симеон ҳам туради. Эшик томон йўналғанда эсларига тушади.

Симеон. Аҳмоқсан, Пит. Мен бўлсам сенга эргашиб... Энди ишламаймиз, кўриб қўйсин.

(Стол ёнига қайтади.)

Питер. Тўғри. Бор-э, кўрсин мана, нима қилаётганимизни.

Ўтирадилар. Эбин дам унисига, дам бунисига тикилади.

Симеон (Эбинга). Фермасини ер ютмайдими!

Питер. Эшакдай ишлаб, унинг олдида бел буқканимиз етар! Керак бўлмасак тўрт томони қибла!

Симеон (Эбинга). Сен бу ерда яккаю ягона хўжайин бўлмоқчи эдинг — мана, бўлақол!

Питер. Ана сигирларинг маъраяпти. Бор, сутингни соф!

Эбин (қувониб). Сизлар-чи? Қоғозга қўл қўясизларми? А?

Симеон (хиссиз). Эҳтимол.

Питер. Эҳтимол.

Симеон. Ўйлаб олишимиз керак. (Буюриб.) Сен бор, ишингни қил.

Эбин (жонланиб). Энди бу яна онамнинг рўзгори. Ҳам меники! Менинг сигирларим! Ўзим, ўз қўлим билан соғаман! (Орқадаги эшикдан чиқиб кетади.)

Симеон (жимликдан кейин). Дадамизнинг ўзи.

Питер. Қуийб қўйгандек.

Симеон. Бир-бирини ражиб ташлайди. Итдек.

Эбин айвондан тушиб, муюлишдан ўтади. Осмон бўзариб келяпти.

Эбин (дарвоза ёнида тўхтаб, атрофга ташна ва ҳайратли назар ташлайди). Тавба, ўлгидай чиройли-да! Бирам чиройлики! (Бошини кўтариб, осмонга дўқ қилгандаи.) Ферма меники, уқдингми! Меники! (Орқасига қайришиб, кўранинг ичкарисига оғилхонага йўналади.)

Симеон билан Питер трубка тутатадилар.

Симеон (оёғини ифлос ботинкалари билан стол устига узатиб, гавдасини орқага ташлаб, тутунни ичига тортади). Нима десанг ҳам, бу ерларга кин-дик қонимиз тўкилган-да.

Питер. Ҳа. (Акасининг ҳаракатларига тақлид қиласди.)

Пауза. Чуқур нафас оладилар.

Симеон (бирдан). Сигир соғишни ҳеч қачон эплолган эмас.

Питер (пиқирлаб). Қўллари — молнинг түёғидек.

(Пауза.)

Симеон. Қани, ану шишани ол-чи. Қиттак отайлик. Томоқ қуруқшаб кетяпти.

Питер. Тўғри айтасан. (Токчадан шишани олади, икки стаканга қуяди.) Калифорниядаги олтинларимиз учун!

Симеон. Омадинг келсин!

Ичадилар, пишқириб ютина дилар, оёқларини столдан оладилар.

Питер. Унча кор қилмаяпти-ю?

Симеон. Каллаи саҳарлаб ичиб ўрганмаганимиз-да.

Жимлик.

Питер. Дим бўлиб кетдими?
Симеон. Юр, ҳавога чиқамиз.

Чиқадилар. Ўйни айланиб ўтиб, дарвоза олдида тўхтайдилар. Ҳайратдан лол қолиб, осмонга тикиладилар.

Питер. Чиройли!

Симеон. Ҳа.

Питер. Ҳозир офтоб ҳам чиқиб, бизга ўхшаб гарбга шошади.

Симеон (*бирдан ҳаяжонини босолмай*). Эҳтимол бу тонг ота макондаги сўнгги тонгимиздир.

Питер. Ҳа, эҳтимол!

Симеон (*ер тениб, ерга мурожсаат қилиб*). Ўттиз йил сени қон ва терим билан субордим. Ўттиз йиллик умримни сенга қўмдим, ҳар бир қарич тупроғинга қоним, терим сингган. Авайладим, парвариш қилдим. Худонинг ўзи кечирсин, бироқ таппичалик ҳам қадрим бўлмади.

Питер. Менинг ҳам.

Симеон. Ҳа, Питер, сенинг ҳам. (*Уҳ тортадилар, кейин тупурадилар*.) Ҳай, тўкилган сутни энди ялаб бўлмайди!

Питер. Фарбда эса — тилла! Балки баҳтимиз ҳам ўша ёқдадир. Бу ерда биз мана бу тош деворларнинг тутқини эдик!

Симеон (*дадил*). Энди ҳеч кимга қул эмасмиз, тамом! (*Бирпас жисм тургач, безовталиқ билан*.) Айтгандай, сут дегандай, Эбин нима қиляпти экан?

Питер. Соғаётгандир-да.

Симеон. Қараашвориш керак эди. Охирги марта.

Питер. Майли. Сигирлар бизга ўрганиб қолишган.

Симеон. Бизни яхши кўришади. Эбинни эса яхши билишмайди.

Питер. Ҳа. Отлар ҳам, чўчқалар ҳам, товуқлар ҳам. Уни яхши билишмайди.

Симеон. Бизларни эса худди туғишигарлардай... Яхши кўришади. Ўзимиз боқиб катта қилганимиз-да.

Питер. Энди бўлса улар бизга бегона, ҳеч нарсамиз йўқ.

Симеон (*бирдан ғамгин*). Ҳа-я. (*Уҳ тортиб*.) Қани бўлмаса охирги марта Эбинга қараашворайлик-да, кейин жуфтакни рострайлик.

Питер. Юр.

(*Молхонага қараб юрганларида Эбин чиқиб келади, у ҳансираған, юргурганга ўхшайди.*)

Эбин (*жуда ҳовлиқсан ҳолда*). Улар келишяпти! Келишяпти! Қари қирчанғи билан жонон. Молхонанинг туйнугидан кўриб қолдим. Ҳов муюлишда, пастдан чиқиб келишяпти.

Питер. Шунча узоқдан кўриб бўлар эканми?

Эбин. Ҳа, нима, кўр эканманми, ўз биямиз билан ўз аравамизни танимай! Ӯшалар! Бошқа ким бўларди. Кўнглим сезиб турувди-я... (*Бесабр, бетоқат бўлиб қолади*.)

Питер (*ачиқ устида*). Мен жойимдан жилмайман, отни ўзи аравадан чиқариб, ўзи қозиқча бойласин!

Симеон (*у ҳам жаҳз билан*). Отланиш керак. Пайдо бўлиши билан кўч-кўронни кўтарамиз-у, жўнаймиз. Улар кирган уй мен учун ҳаром.

Уйга шошади.

Э б и н (*хавотир*). Қоғозга қўл қўймайсизларми ахир?
П и т е р . Пулни столга қўй, кейин имзо чекамиз.

Симеон билан Питер нарсаларини йигиштириш учун юқорига чиқадилар. Эбин шошиб ошхонага киради-да, деразага бир аланглаб, плита ёнида чўкка тушади. Полнинг тахтасини кўтариб, бир халта пул олади ва столга ташлайди. Тахтани ўрнига қўяр-қўймай, оstonада акалари кўринади. Қўлларида эски сафар халтаси.

Э б и н (*халтани ушлаб*). Қўл қўйдингларми?

С и м е о н (*қоғозни кўрсатиб*) Мана. (*Столга ишора қилиб*.) Пулми?

Э б и н (*пулни столга сочиб*). Йигирма доллардан ўтизта танга. Санаб олинглар.

П и т е р (*тангалардан битта-иккитасини тишига босиб кўради, устмуст теради*). Олти юз доллар. Роппа-роса. (*Тангаларни халтага солиб, қўйнига яширади*.)

С и м е о н (*Эбинга қоғозни узатиб*). Ушла.

Э б и н (*қоғозга тикилиб, эҳтиёт билан таҳлайди-да, қўйнига жойлайди*). Раҳмат.

П и т е р . Сенга ҳам раҳмат.

С и м е о н . Ҳайитда сенга ҳам бир парча олтин юборамиз.

Симеон билан Питер жўнаб кетишига юраклари бетламай, бир жойда депси-нишади.

П и т е р . Кетдик бўлмаса.

С и м е о н . Кузатиб чиқсанми?

Э б и н . Йўқ. Мен анавиларни қарши олишим керак.

Ака-ука эшик томон жиладилар-у, яна тўхтайдилар.

С и м е о н . Хайр бўлмаса.

П и т е р . Хайр, Эбин.

Э б и н . Яхши боринглар.

С и м е о н билан П и т е р кетади. Эбин стол ёнига ўтириб, қўйнидан қоғозни олади, печка томон қайрилиб қарайди. Офтоб тушиб турган юзида — ўзга дунё, ҳаловат. Лаблари аста шивирлайди — у ўқияпти.

Бу маҳал акалари дарвозадан чиқиб боради.

П и т е р . Ҳайрон бўлади-да...

С и м е о н . Барибир, ҳамма вақтдагидек, қовоқлари солиқ...

П и т е р . Ёнларида жонон.

С и м е о н . Менга қара, кўриб кетмаймизми ойимча онамиз қанақа эканлар?

П и т е р (*кулиб*). Ўпишиб хайрлашгинг келяптими?

С и м е о н (*у ҳам қулади*). Ўйинга тушгим келиб кетяпти. Ичагим узилиб ўлмасам.

П и т е р . Мен ҳам.

С и м е о н . Қиттак отиб олганимиздан деб ўйлайсанми?

П и т е р . Йўқ. Оёқларимиз эркинликка қараб сакрагиси келяпти.

С и м е о н . Сенинг ҳам ўйинга тушгинг келяптими?

Пауза.

П и т е р (*ҳайрон*). Фалати-я, ажабо!

С и м е о н (*юзи ёришиб*). Худди ўқишилар тугаган-у, таътил бошлангандек. Умримизда биринчи марта этпа-эркинмиз!

П и т е р. Ишонгинг келмайди одам!

С и м е о н. Арқонлар узилди, кишанлар парчаланди, тош деворлар қулади. Кўнглинг хушлаган ишни қил!

П и т е р (*чукур нафас олиб, баландпарвоз*). Бу мол-мулк кимларга қолади-ю, бу тош деворлар кимларга буюради — мен учун бари бир гўр. Кечдим, олаверсинг!

С и м е о н (*дарвозанинг бир қанотини ошиқ-мошиғидан сугуриб*). Биз бу дарвозани, жаҳондаги барча дарвозаларни ҳам йўқотамиз.

П и т е р. Елкалаб кетамиз, йўлда дарёга ташлаймиз — баҳтимиз дарвозаси оқиб кетсин.

От дупури, арава гирчиллаши эшитилади. Симеон билан Питер турган жойида қотиб қолади. Эфраим Кэбот ва Абби кирадилар.

Чол етмиш беш ёшда. Баланд бўйли, озгин, чайир, бақувват одам. Фақат оғир меҳнат анча буқчайтириб кўйган. Юзи тошдан йўнилгандай шиддатли, аммо нимасидадир заифлик, бачкана худбинлик аломати сезилади. Бир-бирига яқин, кичкина-кичкина кўзлари доим чимирилиб туради, қарашлари ўтқир, оғир: чол узоқдан яхши кўрмайди. Эгнида тутмасиз янги қора костюм.

Абби сўлимгина, кучга тўлган аёл, ўттиз беш ёшларда. Юмaloқдан келган юзи кўхлик. Ошкора ҳирс таассуротни бир оз бузиб туради. Лаб қимтишлари куч ва қайсар хулқ-авторини таъкидлаб кўрсатади. Қарашлари дадил. Лекин унинг ҳам бутун қиёфасида, худди Эбинникидай беқарорлик, итоатсизлик ва қўрқиш, безиллаш аломатлари бор.

К э б о т (*ҳаяжонини босиб, сал хирқироқ овоз билан*). Мана, уйга ҳам етиб келдик, Абби.

А б б и (*эҳтирос билан*). Уйдамиз! (*Иморатларга синчков разм солиб, четроқда қотиб турган Симеон билан Питерни кўрмай.*) Ёмон эмас! Менинг уйим! Одам ишонгиси келмайди.

К э б о т (*кескин*). Нега сеники бўлар экан? (*Аббига тикилиб қарайди — Абби ҳам бўши келмай тикилади. Бўшашиб.*) Ҳеч бўлмаса, бизнинг уйимиз, деб гапир. Ёлғизлик қийнаворди мени бу ерда. Айниқса, баҳор кунлари. Хотин киши керак экан рўзгорга.

А б б и (*овозини пасайтириб*). Хотин кишига эса рўзгор керак!

К э б о т (*мужмалроқ бош иргаб*). Шунаقا. (*Бирдан асабий.*) Қаёққа гумдон бўлди булар? Намунча жимжит? Нега ҳеч ким ишламаяпти?

А б б и (*ака-уқаларни кўради*). Уларнинг совуқ назарини пайқаб, аста гапиради). Ана иккита барзангি дарвоза ёнида турибди, булар ишлашнинг ўрнига, менга олайищаати.

К э б о т (*узоқдан яхши танимай*). Кимсанлар...

С и м е о н. Мен — Симеонман.

П и т е р. Мен — Питерман.

К э б о т (*газаби қайнаб*). Нега ишламаяпсанлар?

С и м е о н. Сени қутглаб пешвоз чиқсан эдик, дада. Сени ҳам, иннай...

К э б о т (*сал хижолат тортиб*). А? Ҳа-ҳа... Бу киши сизларнинг янги она-ларингиз бўлади, болаларим.

Абби ака-уқаларга, улар эса бунга тикиладилар.

С и м е о н (*тескари қараб нафрат билан ерга туфлайди*). Кўриб турибман.

П и т е р (*у ҳам худди шундай қиласди*). Мен ҳам.

А б б и (*беписанд*). Мен кетдим бўлмаса. Тезроқ уйларимни кўргим келяпти. (*Сўқмоқ йўлдан аста юриб кетади.*)

Симеон (калақа қилиб). «Үйларим» эмиш!..

Питер (Аббининг кетидан). У ерда Эбинни учратиб қолсангиз эҳтиёт бўлинг: унга ҳам бу менинг уйим, деб ўтируманг тағин!

Абби (ўчакишиб). Эбин? Эбин тугул худосига ҳам айтаман.

Кэбот (нафратли илжайиб). Эбин кирди-чиқдироқ, унга эътибор қилмасанг ҳам бўлади, онасига тортган!

Симеон (захарли киноя билан, кулиб). Йўқ, қария, у сенга тортган. Куюиб қўйгандек. Унча-мунча одам чақолмайди. Ҳали бўғзингдан олади, қарабтур.

Кэбот (бўйруқ оҳангизда). Қани, ҳамманг ишга!

Симеон (Абби кетгандан кейин Питерга қўз қисади; мазах қилиб). Ҳўш, Питер, янги ойимча онамиз ёқдими? Қаттан илинтиридинг уни, қария?

Симеон билан Питер куладилар.

Питер. Уни бекор уйга қўйвординг. Оғилхонага ҳайдаш керак эди. Чўчқалар ёнида яна битта чўчқа-да.

(Симеон билан Питер сонларига шапатилаб, қотиб куладилар.)

Кэбот (буларнинг ҳақоратидан ўзини йўқотиб, тутилиб гапиради). Симеон! Питер! Нима гап?.. Мастмисанлар?

Симеон. Биз озодмиз! Бизга сенинг ҳам ҳожатинг йўқ, бу лаънати рўзгорнинг ҳам!

Питер. Биз кетяпмиз. Бизни Калифорниянинг ёмби олтинлари кутяпти!

Симеон. Истасанг, бу рўзгорга ўт қўйвор!

Питер. Кули кўкка совурилсин!

Симеон. Биз эркинмиз, қария. (Гир айланади.)

Питер (ўйинга тушиб). Ихтиёр ўзимиизда!

Симеон билан Питер куракда турмайдиган гапларни валақлаб, Кэботнинг атрофида ҳиндуларнинг ёввойи рақсини ижро этадилар. Кэбот ғазабда, гоҳо гумонсирайди ҳам: ақлдан озмадимикан булас?

Симеон. Биз эркинмиз. Бош суягингни қозиқда қуритмаганимизга хурсанд бўл!

Симеон. Янги хотинингни зўрламаганимизга хурсанд бўл! Ҳопп-па!

Улар ҳолдан тойиб тўхтайдилар, қаҳ-қаҳ урадилар.

Кэбот (улардан четланиб). Олтин деб эсларингни сб қўйибсан. Баттар бўласанлар ҳали, олтин одамнинг бошини ейди.

Симеон (захархандалик билан). Ё ўша олтинданд сенга ҳам юборайликми? Нима дейсан, қари хотинбоз, юборайликми?

Питер. Олтин Калифорниядан бошқа жойларда ҳам бўлади. (Чол қўрмасин учун четроққа ўтиб, қўйнидаги халтадан олтин тангаларни олиб, осмонга отиб ўйнайди.)

Симеон. Биз ҳам анои эмасмиз.

Питер. Пароходга ўтирамиз-у, ҳоп-па!

Симеон. Эркинлик бағрига, ҳоп-па!

Кэбот (ғазаби тошиб бақиради). Лаънат сенларга!

Симеон. Сенинг қарғишларингдан қўрқмаймиз, ҳоп-па!

Кэбот. Жиннихонага элтиб тиқаман иккалангни!

Питер. Яхши қол, зиқна!

Симеон. Хайр, қонхўр!

Кэбот. Йўқол қўзимдан!

П и т е р . Ҳоп-па! (*Ердан тош олади.*)

С и м е о н (*у ҳам тош олиб*). Ойимча онамиз меҳмонхонадамиканлар?

П и т е р . Бир-икки...

К ә б о т (*даҳшатда*). Эсингни йиғ!

П и т е р . Уч!

Иккаласи бирдан меҳмонхона деразасига қараб тош отади, ойна чил-чил бўлади.

К ә б о т (*дарғазаб*). Кўлимга тушсанг, суюнгни майдалаб ташлайман!

Ўғиллари масхарабозлик билан дарвоза ортига бекинишади, Кәбот қувиб чиқади. Симеон дарвозанинг бир қанотини кўлтиқлаб қочади. Кәбот газабдан бўгилиб ҳовлига қайтади.

Дарвоза ортида Симеон билан Питернинг овози эшитилади. Улар «О, Сюзанна!» деган эски оҳангда олтин қидирувчиларнинг ашуласини айтишади.

«Тоғлар оша, денгизлар оша
Олга!
Олтин бизга интизор.
Уни ликопчада,
Ё жомашовда
Ювиб олабилган — баҳтиёр!
Калифорния!
Менинг севгилим!
Сенга, Калифорния,
Талпинар дилим.

Иккинчи қаватда ётоқхона деразаси очилиб, Абби кўринади.

А б б и (*Кәботга қарайди, мамнун*). Худога шукур, йўқолиши шекилли.

(Чол жавоб бермайди.)

(Уй эгасидай.) Жойлар ёмон эмас. Каравоти юмшоқ. Бу менинг хонамми, Эфраим?

К ә б о т (*бош кўтармай, хўмрайиб*). Бизники.

(Абби юзидаги нафратни яширолмай, деразани ётиб қўяди. Кутимагандан бир фикр келиб.) Булар бир балони бошлаб келишмаса! Молларни заҳарлашмадимикин? Ҳар нима келади ҳаромиларнинг қўлидан! (*Молхонага югурди.*)

Ошхона эшиги очилиб, Абби киради. У ерда ўй суриб Эб и н ўтирибди. Абби оstonада тўхтаб, Эбинга бошдан-оёқ разм солади. Йигитнинг ёшлиги, келишган қадди-қомати унда бошқача ҳислар қўзгайди. Унинг кирганини сезган Эбин бошини кўтаради. Кўзлари тўқнашади. Эбин сапчиб туриб, жаҳл билан унга қараб қолади.

А б б и (*карашма билан*). Сенинг отинг Эбин, шундайми? Мен эса — Аббиман. (*Жилмайиб*). Нима ҳам дердик, мен сенинг янги онангман, Эбин.

Э б и н (*заҳарли товушда*). Сендай онага лаънат бўлсин!

А б б и (*гўё эшишмагандай*). Даданг сени кўп галирарди...

Э б и н . Гапирмай ўлсин!

А б б и . Ундан жаҳлинг чиқмасин, қариб қолган.

(Узоқ жисмлик. Бир-бирларига тикиладилар.)

Мени она дегин демайман, Эбин. (*Шавқ билан.*) Сен шундай бақувват, катта йигит экансан. Дўстинг бўлишни истардим. Ўшанда эҳтимол сен ҳам бу уйда анча енгил тортардинг. Отанг билан муносабатларингни ҳам изга солишга ҳаракат қиласман. (*Ишонч билан.*) У менга йўқ демайди.

Э б и н (аччиқ қулиб). Деб кўрсин-чи! (*Яна бир-бирларига тикиладилар.*) (*Эбин кўзини олиб қочади, хижолат. Бу хотиннинг таъсирига тушиб қолишдан ҳайиқади, айни пайтда сезяптики, жозибаси бор. Шунинг учун нима қилишини билмай, қичқиради.*) Йўлингиздан қолманг!

А б б и (осойишта). Нима ҳам дердик, агар сенга шу ёқса, ҳақорат қил, қиласвер. Мен бошқача муомалани кутганим ҳам йўқ. Лекин мен сени ҳеч нарсада айбламайман. Сенинг ўрнингда бўлсам, мен ҳам шундай қилардим. Ахир қаёқдаги бир хотин онамнинг ўрнини эгаллайди-ю, мен... (*онани эслаганда Эбиннинг сесканиб кетганини пайқайди.*) Сен онангни жуда яхши кўрган бўлсанг керак. Мен онамдан ажраганимда гўдак эдим. Юзини ҳам эслолмайман. (*Пауза.*) Ўлайманки, сенинг хўмрайишларинг ўтиб кетади. Мендан баттари келса нима қилардинг? Сен билан биз эса... кўп жиҳатдан ўхшашмиз. Сени биринчи кўришдаёқ пайқадим. Менинг ҳам ҳаётим оғир кечган — баҳт деган нарсани билмаганман. Кўз очиб кўрганим — қора меҳнат. Етим қолиб, эшикма-эшик бирорвларнинг хизматини қилдим. Кейин турмуш курдим-у, эрим ароқхўр бўлиб чиқди, яна дарбадар бўлдим. Болам ҳам ўлгач, тамом тушкунликка юз тутдим. Эрим оламдан ўтганда, худо кечирсинг, ҳатто хурсанд бўлиб кетдим, чунки энди ихтиёрим ўзимда деб ўйлардим. Аммо тез орада тушундимки, бу ихтиёр бегона хонадонларда бел букиб ишлаш учунгина экан. Мен вақти келиб ўз бошпанам бўлишидан умид узиб қўйгандим. Кейин эса... Мана, даданг учраб қолди...

Ховлига аста Кэбот кириб келади, ўгиллари кетган йўлга қарайди. Қулоқ солади — олистан Калифорния ҳақидаги қўшиқ эшитилади. Муштлари қисилиб, фазаб тўла юзлари хўмраяди.

Э б и н (Аббига маҳлиё бўлаётганидан чўчуб). Учради-ю, сизни бир фоҳи-шадай сотиб олди, шунақами...

(*Аббининг юзига қон қўйилиб келади, уни алам қийнайди. Ўз ҳаётини берилиб ҳикоя қилганида самимий эди. Шунинг учун ҳам Эбиннинг сўнгги сўзи алам қилди.*)

Қанчага сотиб олди? Нимага келишдинглар? Нима бермоқчи? (*Фазаб.*) Ферманими? Онамнинг фермасини-я? Лекин у энди менини.

А б б и (мазах қилиб). Сеники? Буни ҳали қўрамиз. (*Бирдан.*) Менга чиндан ҳам рўзгор керак бўлса-чи, унда нима дейсан? Мункайиб қолган чолга текинга тегибманми?

Э б и н . Бу гапларингизни унга оқизмай-томизмай етказаман.

А б б и (жилмайиб). Ўғлинг ёлғон гапирияпти дейман, у менга ишонади. Сени бўлса ҳайдаб солади.

Э б и н . Сиз хотин эмас, ялмоғиз экансиз!

А б б и (тантана қилиб). Бу менинг фермам... Менинг уйим... Менинг ошхонам...

Э б и н (бўғиб ташлашга тайёрдай). Тилингизни тийинг!

А б б и (унга яқин келиб; юзида ҳам, вужудида ҳам ошкора ҳирс; аста). Юқорида эса менинг ётоғим, менинг тўшагим...

Эбин эсанкираб қолади.

(*Сеҳрловчи очиқлик билан.*) Мен ҳеч кимга ёмонлик истамайман... душманларимдан бошқа. Лекин зарур бўлиб қолса, ўзимни ҳимоя қила оламан. (*Кўлига қўл тегизади.*) Дўст бўлайлик, Эбин.

Э б и н (сеҳрлангандай турибди). Кейин ҳушёр тортуб, қўлини тортади). Йўқ, сиз ажинасиз! Кўргани кўзим йўқ! (*Югуриб чиқиб кетади.*)

А б б и (орқасидан мамнун қараб қолади). Суқсурдай йигит экан! (*Столга кўз ташлайди; магрур.*) Нима ҳам дердик, идиш-товоқ ювгани киришамизда. (*Кулади.*) Ўзимизнинг идиш-товоқни.

Эбин эшикни қаттиқ ёпиб ташқарига чиқади. Отасини күриб, тұхтайди. Күз қарашида нафрят.

Кәбот (құлларини күкка құзіб, ғазабини босолмай). Іншілердің, бебош үғилларимни қаҳринга ол!

Әбин (қиңқириб). Сен ҳам, сенинг тангринг ҳам қарғыш! Нуқул одамларни лаънатлайсизлар, нуқул одамларни таҳқирлайсизлар!

Кәбот (унга әзтибор қылмай). Сенга илтижо қыламан, о, етиму ҳақириларнинг улуф ҳомийсі!

Әбин (мазах қилиб). Үша сифинаёттан худойинг билан құшмозор бўл!

(Кәбот кескин қайрилиб, Эбинга тикилади. Улар юзма-юз туриб қоладилар).

Кәбот (жирканиб). Ҳали сен шунақамисан! Билмаган эканман-ку! (Бармоқ билан ўдағайлаб). Худога тил тегизяпсанми, эси паст! Нега ишламаяпсан?

Әбин. Сен-чи, сен нимага ишламаяпсан? Анавилар жүнаб қолди, бир ўзим қолдим. Ҳамманглар учун битта ўзим ишлашим керакми?

Кәбот (нафрат билан). Э, сенинг қўлингдан нима ҳам келарди. Қари бўлсам ҳам ҳали сендақаларнинг ўнтасига арзийман. Эрқакмисан ўзинг? (Буйруқ оҳангида.) Молхонага юр-чи, қани, қимирла!

Ота-бала кетадилар. Қишлоқнинг у бошидан шамол Калифорния ҳақидаги қўшиқнинг сўнгти мисраларини олиб келади.

Ошхонада Абби идиш-товоқ ювмоқда.

Парда

ИККИНЧИ ПАРДА

БИРИНЧИ КЎРИНИШ

Икки ой вақт ўтди. Жазирама иссиқ, якшанба. Абби ясаниб олиб, айвонда, тебранма курсида ўтирибди. Эринчоқлик билан тебранганча, иссиқдан тинкаси куриб, құлларини осилтиради, кўзларини юмади.

Эбин ўз хонасининг деразасидан қарайди. Айвонда бирор борми-йўқми, дегандай аста қулоқ солади. У жуда эҳтиёткор бўлса ҳам Абби унинг ҳаракатларини сезиб турибди. Тебраннишдан тўхтаб, қимир этмай кутади. Эбин фақат Аббини ўйлайверганидан хафа, бир туфлаб ўз хонасига қайтади.

Абби ҳаяжонини босолмаяпти. Нафаси ичига тушиб, уйдаги ҳаракатларга қулоқ солади. Ниҳоят, айвонда Эбин пайдо бўлади. Уларнинг кўзлари тўқнашади. Эбин хижолат, орқасига ўғирилиб, эшикни тарақлатиб ёлади. Қовоғини осилтириб, Аббини кўрмаганга олиб ўтиб кетади. У ҳам башант кийинган, қириңган, юзлари ялтираб турибди. У ўтганда Абби олдинга эгилиб ошкора кулади.

Әбин (алам қилиб, қайрилиб қарайди, асабий). Намунча қиқирлайсиз?

Абби (ошкора ноз билан). Сени кўриб, кулгим қистади.

Әбин. Нима, бирон жойим тешикмикан?

Абби. Юришинг бозорда кўз-кўз қилинаётган ҳўқизга ўхшайди.

Әбин (мазах қилиб). Ўзингизни ҳам жуда гўзал малика деб ўйламанг!

(Бир-бирларига тикиладилар. Иккаласи ҳам ногоҳ эҳтирос түғёнида.)

Абби (юшиш). Сен ундоқ деб ўйламайсан-ку, ахир. Эҳтимол, ўлар эдингү, эплолмаяпсан. Учрашган кунимиздан бери ўз-ўзингни ишонтироқчи бўласан. (Ундан кўз узмай, секин кулиб, жим қолади. Кейин, қараашма билан сонларини диркиллатиб, шивирлади.) Куёш совиб қолгани йўқ-ку. Ана, ерни қандай қизитяпти, сезиб

турибсан. Жамики гиёхлар ўсиб-униб, унга талпиняпти. У сенинг күнглингни ҳам ўртаб, уни бетоқат талпинтириб турибди... Ким биландир қовуштиромөччи. Сен бўлса қаршилик кўрсатасан, аммо табиат ўзиникини қиласди, сени ҳам мана бу гиёхлар, мана бу дараҳтлар сингари иссиқча, ёруғликка талпинтиради.

Э б и н (*унинг афсунидан қутулишга уринади, ийманиб*). Шу гапларингизни дадам эшитса борми... (*Кескин.*) Ҳайтовур, сиз чолнинг бошини шундай айлантиргансизки...

А б б и (*кулади*). Ахир у мулойимроқ бўлиб қолди, сенга щуниси яхши эмасми?

Э б и н (*ўчакишиб*). Йўқ. Ҳозиргача мен фақат у билан курашардим, энди бўлса, у билан ҳам, сиз билан ҳам. Мен онамнинг ҳақ-хуқуқини — ўзимнинг бу уйга бўлган ҳақимни ҳимоя қилишим керак. (*Аббининг сехридан қутулиб, тили ечилади.*) Мени лақиллатолмайсиз! Сиз ҳамма нарсага чангл солиб, ўзингизники қилиб олмоқчисиз. Мен сиз ўйлаганлардан эмасман, овора бўласиз! (*Захарханда билан тескари ўгириласди*.)

А б б и (*қадди-қоматини кўз-кўз қилиб, таманно ва ноз билан пичирлаб*). Эбин...

Э б и н (*эшик томон юриб*). Сиз билан гаплашадиган гапим йўқ.

А б б и (*буйруқ оҳангида*). Эбин!

Э б и н (*тўхтайди; дагал*). Нима дейсиз?

А б б и (*ҳаяжонини босмоқча уриниб*). Қаёққа кетяпсан?

Э б и н (*ясама бепарволик билан*). Ўйнаб келмоқчиман.

А б б и. Қишлоққами?

Э б и н (*бегам*). Эҳтимол.

А б б и. Минниникигами?

Э б и н. Эҳтимол.

А б б и (*енгилиб*). Нима қиласан уни?

Э б и н (*истеҳзо билан*). Ўзингиз айтдингиз-ку: табиатга қарши бориб бўлмайди деб. (*Кулади, кетмоқчи*).

А б б и (*жажали тошиб*). У бориб турган бадбуруш кампир-ку!

Э б и н (*кулиб*). У сиздан кўра чиройлироқ!

А б б и. Ҳар бир масти аласт қўйнига киради.

Э б и н. Бўлса бордир. Лекин барибири у сиздан кўра тузук.

А б б и (*овозини кўтариб*). Мени унга тенг қилма!

Э б и н. Нима десангиз ҳам, у менинг ҳаққимга чанг колаётгани йўқ.

А б б и. «Менинг ҳаққим»? Шу билан, ферма менга қарашли демоқчимисан?

Э б и н. Ҳа, уф, сиздай суюқ хотин чанг колаётган бу ферма асли менини.

А б б и (*дарғазаб*). Бу ферма ҳеч қачон сенини бўлмайди. Ҳеч қачон! (*Бақириб*). Йўқол кўзимдан! Бор ўша фоҳишангнинг ёнига, бошимизга битган иснодсан! Отангга бир оғиз айтсан, остоңдан қувиб солади, ўзинг шунга мажбур қиляпсан. Чидаб юрганимга хурсанд бўл, бўлмаса... Бор жўна! Кўргани кўзим йўқ турқингни. (*Жим қолади. Газабдан нафаси тиқилади*.)

Э б и н (*у ҳам шундай тикилади*). Мен ҳам сизни кўргани кўзим йўқ. (*Кетади*).

Абби унинг кетидан газаб билан тикилиб қолади.

Ховлининг орқа томонидан, молхона томондан Кэбот чиқиб келади. У жуда ўзгариб кетган. Кўзларида ғалати ўйчанлик, қиёфасида майнлик, раҳм-шафқат пайдо бўлган. Айни вақтда, жисман тетик, гўё яшариб кетгандек. Абби уни кўргач, нафрат билан тескари қарайди.

К э б о т (*Аббига аста яқинлашиб*). Эбин билан яна ади-бади айтишаяпсанларми?

А б б и (*иттоаткорона*). Йўқ.

Кэбот. Шовқинларинг молхонагача эшитиляпти-ку. (*Айвон зинапоясига ўтиради*).

Абби (*шошиб*). Эшитган бўлсанг, яна нега сўраяпсан?

Кэбот. Овозларингни эшитдим-у, гапларингта тушунганим йўқ.

Абби (*енгил тортиб*). Арзийдиган гап бўлгани йўқ...

Кэбот (*жимликдан кейин*). У ўзи галати.

Абби (*алам билан*). Ўзингга тортган.

Кэбот (*қизиқиб*). Ростданми? (*Пауза*). Биз у билан сира чиқишолмадик. Мен унинг ювошлигини ёқтирмайман.

Абби (*нафрат билан*). Ювош эмиш! Сенга ўхшайди-ю, ювош бўлар эканми!

Кэбот (*ўз ўйлари билан бўлиб*). Эҳтимол мен унга меҳр кўрсатолмагандирман.

Абби. Эвазига, мана энди ўлгидай мулойим бўлиб қолибсан. Таппидек мулойим. Бу — ўғлингнинг гали.

Кэбот (*қовоги уйилиб*). Шунаقا деди, дегин? Менинг жигимга тегмагани тузук эди...

(*Пауза. Абби ҳамон четга қараб турибди*).

(*Сал юмшайди. Осмонга тикилиб*.) Чиройли-а?

Абби (*зарда билан*). Осмон осмон-да, нима бўпти?

Кэбот. Осмон... илиқ, худди янги шудгордай.

Абби (*захарханда билан*). Осмонда ҳам яна битта ферма очмоқчимисан, нима бало?

Кэбот (*босиқ*). У ердан ўзимга макон истайман. Қариб қолдим, Абби.

(*Пауза. Абби унга гарансиб қарайди*.)

Уй ҳамиша совуқ, ҳатто саратонда ҳам. Сенга ҳам совуқми?

Абби. Пайқаганим йўқ.

Кэбот. Молхонада иссиқ, ҳиди ҳам ёқимли. Моллар ёнида иссиқ. (*Пауза*.) Сигирлар ҳам галати.

Абби. Сенга ўхшаб.

Кэбот. Эбинга ўхшаб. (*Пауза*.) Мен бориб-бориб у билан ярашсан кепрак. Онаси билан ҳам шундай бўлган эди. Унинг ювошлигини кечирганман. Бу ҳам эси паст тентак бўлмаганида аллақачон чиқишиб кетар эдим. (*Пауза*.) Кексалик менинг енгаяпти чамамда.

Абби (*шафқатсиз*). Нафасинг мунча совуқ! Ўлаётганинг йўқ-ку ҳали.

Кэбот (*бирдан уйгонгандай*). Йўғ-е, худо урдими! Мен ҳали ёнгоқдай бакувватман. (*Пауза*.) Лекин етмишдан кейин у дунёликни ҳам ўйлаш керак. Шунинг учун Эбингнинг фамини еяпман-да. Бебош акалари жаҳаннамга гум-дан бўлишди, энди Эбингдан бўлак ҳеч кимим йўқ.

Абби (*хафа бўлиб*). Ие, мен-чи? Намунча Эбин-Эбин деб қолдинг? Менинг оғиз тилга олмайсан! Ё хотининг масманни мен.

Кэбот (*соддалик билан*). Ҳа, хотинимсан. (*Аббига тикилиб туриб, бирдан очкўзлик билан қўлларига ёпишади, маҳкам ушлаб, телбадай гапиради*.) Сен менинг қизил гулим! Гўзалимсан! Кабутардек зангор кўзларинг, оловдек ёнар лабларинг... Кўкракларинг — икки жажжи қўзичоқ... (*қўлларини ўпади*.)

Абби (*уни қўрмагандай ўтирибди, кейин хўмрайиб қўлини тортиб олади, шиддат билан*). Ҳўш, демак, фермани Эбинга қолдирмоқчисан? Шундайми?

Кэбот (*ҳайрон*). «Қолдирмоқчисан» дедингми? Йўқ, мен ҳали ҳеч нарсанни ҳеч кимга қолдирмоқчи эмасман.

Абби. Ҳа, нима, орқалаб кетармидинг?

Кэбот (*бир оз ўйлагач, ҳафсаласиз*). Ҳа, орқалаб кетиб бўлмайди. (*Жим бўлиб қолади. Кейин яна бирдан қизишиб*.) Агар иложи бўлса, худо ҳаққи, орқалаб олиб кетардим, ҳа! Ёки сўнги нафасимда ўт қўйиб юборардим-у, қандоқ ёнишини томоша қили-и-б жон берардим. Уйни ҳам, дараҳтларни ҳам, экинларни ҳам, барини, битта гиёҳигача қолдирмай ёндириб, кулини

кўкка совуриб кетардим. Токи, ҳаммаси ўзим билан бирга йўқ бўлганини, бир умр қад букиб, тер тўкиб топганларим биронта ҳаромининг қўлига тушмаганини қўриб-билиб ўлардим. (*Бир оз жисм қолиб, кейин телбанамо давом этади.*) Сигирлар... факат сигирларни далага ҳайдаб юборардим.

Абби (кескин). Мени-чи?

Кэбот (жисилмаяди). Сени ҳам қўйворардим.

Абби (баджаш). Бу сенга хотин бўлишга розилик берганим учун мукофот экан-да. Сендан ҳамиша нафратланиб юрган Эбинингга меҳр қўйиб қолдинг? Мени эса энди молдай ҳайдаб юбормоқчимисан?

Кэбот (шошиб). Менга қара, Абби. Менда ундай ният йўқлигини ўзинг биласан-ку.

Абби (қасоскорона). Йўқ, сен гапимни бўлмай тур! Ҳозир биласанми қаёққа кетди? Минни деган ўша фоҳишанинг қўйнида ётибди. Борма дедим, қаёқда, қулоқ солармиши! Сенга ҳам, менга ҳам иснод келтиряпти, ҳа!

Кэбот (хижсолат тортуб). Хотин-қизга ўч, қонида бор. Ҳирс еб қўйяпти уни.

Абби (газаби ошиб). Шунинг учун менинг ҳам йўлимни тўсгани тўсган. Ё энди буни ҳам кечирасанми?

Кэбот (паузадан кейин, секин). Йўлимни тўсади дегин?

Абби (учакишиб). Ҳозиргина ҳол-жонимга қўймай тармашди. Шовқин согланимиз шундан эди.

Кэбот (Аббига тикилади, нафратдан юзи буришади; сапчиб туради, газабдан титраб). Мана, худо ўртада, ўлдирман у болани!

Абби (Эбидан хавотир). Йўқ, йўқ, ундай қилма!

Кэбот (кўзига қон тўлиб). Калласини мажақлаб ташлайман!

Абби (ёнига келиб, қучади). Йўқ, Эфраим, қўй!

Кэбот (нари суриб). Худо ҳаққи, ўлдирман.

Абби (осойишта). Менга қулоқ сол. У шунчаки жиннилик қилди-да, ҳазиллашди... Жиддий гап бўлгани йўқ. Ҳазиллашди, холос.

Кэбот. Йўлимни тўсади деяпсан-ку?

Абби. Айтдим-да, бутун рўзгорни унга қолдираксансан деб ўйлаб, жаҳлим чиқиб кетди. Жаҳл устида...

Кэбот (сал юмшаб). Мен уни қамчи билан савалайман, агар сен истасанг — ҳайдаб ҳам юбораман.

Абби (қўлидан ушлайди). Хотиржам бўл, мен ўзимни ҳимоя қила оламан. Ҳайдашнинг кераги йўқ. Бу ақлдан эмас, ахир. Рўзгорда ўзингга ким қарашади, ёлғизсан-ку.

Кэбот (ўйлануб қолади, кейин маъқуллаб бош иргайди). Ҳа, ишнинг кўзини билиб гапиряпсан, калланг жойида. (*Асабийроқ.*) Майли, қолақолсин. (*Зинапояга ўтиради.*)

(*Ёнига Абби ҳам ўтиради.*)

(*Ғўнғиллаб.*) Нима жин урди бу аммамнинг бузорини! Ҳамма гап шундаки, бордию бандаликни бажо келтириб, бу омонат дунёни топширсам... фермада ким ишлайди? Симеон билан Питер жаҳаннамга гумдон бўлишди, буниси ҳам ўшалар кетидан қочиб қолса ажаб эмас.

Абби. Мени эсдан чиқариб қўяйпсан.

Кэбот. Сен аёл нарсасан.

Абби. Мен сенинг хотинингман.

Кэбот. Сен — бошқа, пушти-камаримдан бўлган фарзанд бошқа. Фарзанд меники, менинг давомчим бўлади, ҳатто жасадимни етти қават ер тагига кўмиб ташласалар ҳам! Тушундингми?

Абби (нафрат билан). Ҳа. Тушундим. (*Кўзини қисиб унга тикилади, размсолади.*)

Кэбот. Мен қариб қоляпман. Лекин ҳали чинордай бақувватман, яшайман ҳали. Худо ҳаққи, ҳеч бир йигитдан қолишмайман.

Абби (бидан). Балки худо ўғил ато этар?

Кэбот (кескин қайрилиб, ташна күзларини тикади). Ўғил? Сен билан бизга-я?

Абби (эшилиб). Сен ҳали зёр эркаксан, Эфраим. Нима учун фарзанд күрмас эканмиз? Бунинг ҳеч ҳайрон қоладиган жойи йўқ. Мунча менга тикилиб қолдинг, очифини айт, ўзинг ҳам шуни ўйлаб юрардинг-ку? Мен бўлсам, фикри-зикрим шунда. Кечалари худога илтижо қиласман, битта ўғил ато этгили, деб.

Кэбот (юзи қувончдан ёришиб). Сен-а? Ўғил кўришимизни истайсанми?

Абби (таъкидлаб, қатъий). Ҳа. Ўғлимиз бўлишини истайман.

Кэбот (қўлидан маҳкам ушлаб). Бу худои таолонинг марҳамати бўлади, менинг гариб кексалигимда. Сенинг учун ҳамма нарсага тайёрман. Сен худодан тила...

Абби (гапни бўлиб). Фермани менга васият қиласан.. яна...

Кэбот (эҳтирос билан). Айтдим-ку — нима дессанг шу, қасам ичаман! Қасамхўрни дўзах ўтига ташлайди худо. (*Тиз чўқади, Аббини ҳам тиз чўқишига мажбур этади. У жуда умидвор, вужуди қалтирайди.*) Худодан тила, Абби, ўғил тила. Бугун якшанба. Биргалашиб илтижо қиласми. Йикита бандасининг дуоси наҳот қабул бўлмаса! Биби Роҳила ҳам ўғлини худодан тилаб олган экан. Зора, сенинг ҳам тилагинг, Абби... илтижо қил, ёлбор. (*Дуо оятларини пичирлаб, бош эгади.*)

(*Абби ҳам пичирлаганча унга кўз қирини ташлаб қўяди, унинг қарашида ма-зах ва устунлик ифодаси.*)

ИККИНЧИ КЎРИНИШ

Кечки саккиз. Кэбот билан Аббининг ётоқхонаси. Чапда Эбиннинг ётоги.

Эбин ички кўйлақда, яланг оёқ, муштини иягига тираб, каравотда ўтирибди. Қовоги солиқ, диқати бир жойда, юзида эса — умидсизлик. Девор орқасида Кэбот билан Абби; улар ҳам ички кўйлақда, чодиршаб тутилган каравот четида ёнма-ён ўтиришибди. Кэбот ҳали ҳам галати бир безовта кайфиятда — ўғил кўриш ҳақидаги фикрдан оромини йўқотган. Хонада пирпираబ шам ёнади.

Кэбот. Рўзфорга ўғил керак.

Абби. Менга ҳам керак.

Кэбот. Назаримда, сену ферма — бир бутунсизлар. Ёлгизман, шунинг учун сенга талпинаман, Абби. (*Тиззасига муштлаб.*) Фермадан ва мендан ўғил туғишинг керак.

Абби. Нималарни валдираяпсан? Ёт, оромингни ол.

Кэбот (бетоқат). Йўқ, миям тиниқ менинг. Сен мени ҳали билмайсанда, шунинг учун шундай деяпсан. (*Руҳи тушиб, полга тикилади.*)

Абби (лоқайд). Эҳтимол.

Кўшни хонада Эбин ўрнидан туриб, у ёқ-бу ёққа юради. Абби дарров қулоқ тутади. Эбин тўхтаб, деворга тикилади. Улар девор орқали бир-бирларини кўриб тургандай. Эбин гўё сеҳрланган, девор томонга қўл узатади, Абби эса бу вақт ўрнидан туради.

Эбин тўсатдан ўйгониб кетгандай эсини йигиб, ўзидан нафратланганча тўшакка чўзилади, юзини ёстиқ остига бекитади. Абби енгил нафас олиб, жойига ўтиради, бироқ девордан кўзини узмайди. Эбин ётган хонадаги ҳар бир шарпага қулоғи динг.

Кэбот (бидан бош кўтариб, хотинига қарайди, нафратланиб гапиради). Бир кун келиб, сен мени тушунармикансан? Мени тушунадиган одам топилармикин? (*Бош чайқайди.*) Топилмаса керак. Ҳа, унақа одам йўқ. (*Аббига қарамай, унинг тиззасига қўл қўяди.*) (*Хотин сесканади, унга хўмрайиб боқади.*

Эри тескари қараб турганини күргач, яна деворга тикилади.) (Үз ўйларидан сиқилиб кетиб, яна хотинига мурожсаат қиласы.) Менга қара, Абби. (Хотин унга эътибор қилмайды.) Бу жойларга келганимга ярим аср бўлди, у вақт йигирма ёшда эдим, шундай бақувват, чайр эдимки, сен бундай йигитни сира учратмагансан. Эбиндан ўн марта кучлироқ эдим. Бу жойлар тақир яланглик, турган-битгани тош эди. Шу ерда қоламан, десам, одамлар қаҳ-қаҳ отиб қулишган. Лекин улар мен билган сирдан бехабар эдилар. Агар сен тош устида экин ўстиролсанг — худо ярлақаган одамсан дейишди. Устимдан кулганларнинг бундай ишга қурби етмасди. Заиф одамлар худонинг марҳаматига ишонмайдилар. Улар қулишни биладилар, холос! Лекин мана энди қулиб кўришсиз-чи! Бири шу ерда ўлиб кетди, бошқаси олтин излаб кетиб, ўша ерда ўлди. Ҳозир биронтаси йўқ. Осон йўл билан мўмай бойлик орттиришни истаганларнинг қисмати шу, худо эса кудратли, фақат кучли одамларга қайишади. (Аста бош чайқаб.) Мен шиддатли эдим, мени «шафқатсиз одам» дейишарди. Шафқатсизлик гўё гуноҳдай! «Қасам ичаманки, дедим мен уларга, мен бераҳм бўлавераман, қани, кўрайлик-чи, бу сизга ёқармикин!» (Бирдан.) Лекин менинг ҳам юрагим шув этган пайтлар бўлган. Бир-икки йилдан кейин итдай толиқиб, тош кўзимга ёмон кўриниб, алам ўтиб кетди ичимга, умид уздим ҳамма нарсадан. Одамлар бирин-кетин фарбга қараб жўнаётган пайт эди. Шуларга эргашдим. Кечаю кундуз йўл юриб, ёввойи ўлкаларга тобора ичкарилаб бораардик. Бир маҳал етдик манзилга, тупроғи кўмирдай қопқора, лекин тош йўқ. Олтин бору тош йўқ. Эксанг-тиксанг, бемалол, унаверади, ҳосилини кутиб, тамакини тутатиб ўтиравер. Жуда бойиб кетиш мумкин эди! Лекин кўнгилда бир мунгли нола сира тинчлик бермади. «Ҳей, қайт!» дейди. «Бу жойлар сенинг жойинг эмас, қайт орқангга!» дейди ўша садо. Бу қандайдир машъум садо эди, мен қўрқдим... Ҳосилни ҳам кутмай, ҳаммасини ташлаб, жўнаб қолдим. Шунча қилган меҳнатим... Менга қара, мен эмас, худонинг ўзи, қисматнинг ўзи шафқатсиз. Худонинг ўзи тош, у тошнинг ичиди. Авлиё Петрга ҳам нима деган, эсингдами: «Қояннинг устига тошдан бутхона сол, мен ўшанинг ичиди бўлман», деган, ҳа! (Оғир ух тортади. Пауза.) Тош. Тошлар. Мен уларни териб, девор тикладим. Ҳаётимнинг бутун тарихи мана шу деворларнинг тошларига битилган. Ҳар куни, йиллар давомида тош ташиб, далаларимни ихота қилдим, ҳосил беришга мажбур этдим! Бу худонинг амри, мен унинг қўлида бир қурол эдим. Бу мушкул иш, лекин худо мени ўзи чиниқтириди. Мен ҳамиша ёлғиз эдим. Кейин уйландим. Симеон билан Питер пайдо бўлди. Йигирма йил давомида хотиним мени тушунолмади. У яхши хотин эди, қўл қовуштириб ўтирамади, лекин нима учун ишлаётганини бир умр англамади, бояқиш. Мен ҳамиша ёлғиз эдим. Хотиним ўлганда бу ёлғизлик тугайдиганга ўхшаган эди. (Пауза.) Йилларимнинг ҳисобини йўқотдим — уларни санашга вақтим етишмасди. Сим билан Питер ёрдам беришли, ферма кенгайгандан кенгайди. Бу менинг бойлигим эди, фақат менини. Ферма ҳақида ўйлаганимда ёлғизлигим сезилмас эди. Лекин ҳамма вақт бир нарсани ўйлай бериш бўлмас экан. (Пауза.) Мен яна уйландим, Эбин дунёга келди. Аммо хотинимнинг уруғлари фермага чангол солишимоқчи, қарасам. Менинг фермамга. Шунинг учун Эбин ҳозир ҳам ҳар замонда, ферма онамники, деган аҳмоқона гапларни қўзғаб юради. Ҳомкалла! Онаси чиройли эди, лекин жуда бўшанг, латта. У ҳам мени сира тушунган эмас. Гоҳо қаттиқўл бўлишга уриниб ҳам кўтарди-ю, эплолмасди. Бу хотин билан ўзимни баттар ёлғиз сезабошладим. Үн олти йил деганда ўлиб кетди. (Пауза.) Болалар билан қолдим; улар мендан қаттиқўллигим учун нафрлатанишарди, мен эса улардан — бўшангликлари учун. Она сути оғиздан кетмай, мендан фермани талаб қилабошлашди. Менинг фермамни. Бу мени баттар аламзада, шафқатсиз қилди, қаритди. Улар менинг ўзим учун бунёд этган бойликларимни талаб қилишарди. (Аббига қарайди.) Бу кўклам яна мени тангрининг ўзи эслаб қолди. Ёлғизлигимга раҳми келди-ю, «бор,

изла, марҳаматимни аямайман» деди худо. (*Хотини томонга ўғирилади.*) Мен сени излаб кетдим, Абби ва топдим. Сен менинг атиргулимсан!..

(*Абби совуқ юзини ўғириб, газабнок тикилади.*) (*Бир зум муз қотиб, дагал гапиради.*) Ҳикоямдан бирон маъно уқдингми?

Абби (*гарансиб*). Уқдим шекилли.

Кэбот (*уни нари суриб*). Сен ҳеч нарса тушунмадинг, тушунмайсан ҳам. Фақат ўғил туғиб, ўзингни оқлашинг мумкин — акс ҳолда...

Абби (*жашл билан*). Худодан илтижо қиляпман-ку?

Кэбот (*аянч*). Тила, тинмай илтижо қил!

Абби (*осойишта, лекин таҳдид оҳангид*). Бўпти. Ўғил туғаман. Ишонавер.

Кэбот. Бунақанги иш қуруқ ваъда билан бўладими? Қаёқдан билақолдингки...

Абби. Мен фол очдим. Сезиб турибман... (*Галати илжаяди.*)

Кэбот. Ким билади тағин, балки сезгандирсан. Гоҳо сенга қараб туриб юрагим музлаб кетади. (*Сесканади.*) Уй ҳам совиб кетдими? Совқотяпман, яна ёлғизман. Ҳамма вақт бурчакда нимадир шитирлаётганга ўхшайди. (*Туғиб, шимини, ботинкасини кияди.*)

Абби (*ҳайрон*). Қаёққа?

Кэбот. Иссиқроқ, тинчроқ жойга борай. Сигирлар ёнига. (*Аянч*.) Мен улар билан гаплашаман ҳам, улар гапимга тушунишади. Фермани ҳам билишади, мени ҳам. Улар билан сухбатлашсам кўнглим тинчиди.

Абби (*хавотир олиб*). Иситманг йўқми, Эфраим?

(*Кэбот жавоб бермай, тўйқ-тўйқ босиб чиқиб кетади.*)

Эбин каравотда ўтириб, қулоқ солади. Абби орадаги деворга тикилади. Кэбот уйдан чиқиб, муюлишдан ўтгач, дарвоза олдида тўхтаб, осмонга кўз ташлайди.

Кэбот (*қўлларини ёйиб*). Ё раббий, гойибдан овоз бер!

Жавоб кутгандай, қулоқ тутиб туради, садо бўлмагандан кейин қўлларини тушириб, бош чайқайди-да, аста юриб, молхонага киради.

Эбин билан Абби девор орқали бир-бирларига тикиладилар. Эбин оғир уҳ тортади. Абби унга акс-садодай жавоб қайтаради. Иккаласи ҳам кучли ҳаяжонда. Ниҳоят, Абби туриб, деворга яқинлашади ва қулогини тутади. Эбин ҳовлиқиб қолади. Абби девордан узоқлашиб, эшик томон юради. Эбин ҳам худди уни кўриб тургандай, ҳаракатларини бехато тақрорлайди. Эбиннинг эшиги товушсиз очилиб, Абби киради. Эбин қотиб қолади. Аёл бир зум унга қараб тургач, енгил «оҳ» тортиб, йигит томон отилади. Қучоқлаб, юзларидан ўпабошлайди. Энди ҳушига келгандай, Эбин ҳам уни қучиб, қаттиқ ўпади. Сўнгра уни бирдан итариб четлатади. Иккаласи ҳам эҳтирос оғушида, нафаслари ичларига тушиб, бир-бирларига рўбарў туриб қоладилар.

Абби (*дард билан*). Нега ундей қиласан, Эбин? Ўзингни олиб қочма! Мен билан баҳтингни топасан.

Эбин (*кескин*). Баҳтинг керак эмас менга!

Абби (*ожиз*). Кўнглингда ундей ўйламайсан-ку, Эбин. Нима қиласан ёлғон гапириб!

Эбин (*нафрат билан*). Айтдим-ку, сендан менга ҳеч нарса керак эмас! Нафратланаман сендан!

Абби. Мен сени ўпдим, сен ҳам мени ўпдинг. Лабларинг ўтдай ёниб турибди. Ўзингни алдама. Агар лоқайд бўлсанг, бўсаларимга жавоб қайтар-масдинг, лабларинг ўтдай ёнмасди.

Эбин (*лабларини артиб*). Бошқа жононни ўйлаганимдан шунаقا.

Абби (*қаттиқ ботиб*). Хаёлинг Миннидами?

Эбин. Эҳтимол.

А б б и (дард билан). Бордингми ўшаникига? Айт — бордингми? Шуни деб мени рад қиляпсанми?

Э б и н (тиржайиб). Шундоқ бўлса нима бўпти?

А б б и (газаби қайнаб). Ундан бўлса — сен ҳайвонсан, Эбин Кэбот!

Э б и н (масхаралаб). Тўхта, тўхта, мен билан бундай гаплашишга нима ҳаққинг бор сенинг?

А б б и (кулиб юборади). Нима ҳаққим бор? Эҳтимол сен мени ошиқ бўлиб қопти деб ўйлагандирсан? Сенга-я, сендай аянчли бир маҳлуқча-я? Овора бўласан! Сен менга кераксан, гап шунда! Кераксан, билдингми? Меники бўласан ҳам. Чунки мен сендан кучлироқман.

Э б и н (кескин). Тушуниб турибман, бу — сизнинг режаларингизнинг бир қисми. Ҳамма нарсага чангаль соласиз.

А б б и (мазах қилиб). Эҳтимол.

Э б и н (газабга миниб). Чиқинг ётогимдан, йўқолинг!

А б б и . Бу менинг хоналарим, сен бир ёлланган хизматчисан, холос.

Э б и н . Йўқолинг, бўлмаса бўғиб ташлайман!

А б б и (ишонч билан). Мен эса сендан қўрқмайман. Мана шунча ҳам. Сен қўйнимга киришинг мумкин. Лекин сендайлар ўзи хоҳлаб турган хотинни ҳеч қачон ўлдиролмайди. Кўзларингдан қўриниб турибди, менга ҳирс билан талпинасан, лабларинг бўса деб титраяпти, қўйиб берсам, бўйниларимни тишлаб-тишлаб олардинг.

(Эбин сеҳрлангандаид, даҳшат билан қараб турибди.) (Устунлигини сезиб телбанамо хоҳолаб кулади.) Бу уй бутунлай меники, фақат пастдаги битта хона меники эмас. Аммо шу кеча у ҳам меники бўлади. Мен ўша ерда кутаман, Эбин. Шам ёққанимда туш. (*Масхараомуз таъзим қиласи*.) Менга жиндек хушомад қилмайсизми, мистер Кэбот?

Э б и н (бўғиқ товушда). Ҳаққингиз йўқ. Онам ўлганидан бери у хонага ҳеч ким оёқ қўймаган. Сизга ҳам мумкин эмас.

(Аббининг қарашида шундай ўртагувчи эҳтирос ёнадики, Эбин ўзини йўқотиб, жим қолади.)

А б б и (эшик томон юради, Эбининг нигоҳини сезиб, яна айтишига жазм этади). Мен сени кутаман, Эбин. (*Кетади.*)

(Эбин орқасидан қараб қолади, эшикка яқинлашади. Биринчи қават деразасида чироқ ёнади.)

Э б и н (ғўнғиллаб). Ўша ерда, пастда?.. (*Курсидан оқ кўйлагини олиб кияди, галстук тақади, пиджак кийиб, шляпасини олади. Ўзи оёқ яланг, атрофга аланглаб, ҳайратда шивирлайди.*) Ойи, қаердасан? (*Аста эшик томон юради.*)

УЧИНЧИ ҚЎРИНИШ

Бир неча дақиқадан сўнг. Гўрдай совуқ, қоронги меҳмонхона. Хонадон аъзолари худди шу ерга тириклай кўмилгандек. А б б и хонадаги ҳамма шамларни ёқади, меҳмонхонадаги гарип вазият кўз олдидা бор бўйича намоён бўлади. Даҳшат билан қочиб чиқиб кетишдан ўзини зўрга тийиб, диваннинг бир четида қимир этмай ўтиради. Эшик очилиб, Э б и н киради. Яланг оёқ, бошида шляпа. Хижолат тортиб, оstonада тўхтаганча Аббига тикилади.

А б б и (асабийроқ, лекин мулоийим). Балки ўтирасан?

Э б и н (беихтиёр). Ҳа. (*Шляпасини останага аста қўйиб, Абби ёнига кела-ди-да, диваннинг бир чеккасига ўтиради. Иккиси ҳам жиiddий, полга тикилиб қолишади.*)

А б б и . Бу ерга кирганимда хонада кимдир бордай туюлди.

Э б и н (жўнгина қилиб). Ҳа, у — онам.

А б б и . Назаримда, ҳозир ҳам бирор борга ўхшайди.

Э б и н . У — онам.

А б б и . Шундай қүркдимки, аввал қочиб чиқиб кетмоқчи эдим. Энди, сен келгандан кейин, хонага сал файз кирди. (*Хавога.*) Раҳмат сизга.

Э б и н . Онам мени яхши күрарди.

А б б и . Эҳтимол у менинг сени яхши күрганимни ҳам пайқаётгандир. Шунинг учун ҳам хонага сал файз кирди.

Э б и н . Билмадим. Назаримда, у сиздан нафратланади.

А б б и . Йўқ. Сезиб турибманки, ундан эмас.

Э б и н . Унинг ўрнини эгаллаганингиз учун, унинг уйида турганингиз учун, у жон берган хонада ўтирганингиз учун нафратланади. (*Бирдан жим бўлиб қолади; нимагадир бесаранжом, атрофга аланглайди.*)

А б б и . Нима гап, Эбин?

Э б и н . У бизнинг бу гапларимизни ёқтирмаляпти.

А б б и (*жонланиб*). Албатта-да, Эбин. У мени ёмон кўрмайди. Мени ёмон қўришга асоси ҳам йўқ. Биз таниш эмас эдик, ахир.

Э б и н . Отамда кеки бор.

А б б и . Биз ҳаммамиз отангга кек сақдаймиз.

Э б и н . Ҳа. (*Ховлиқиб*.) Худди шундай, худо ҳаққи.

А б б и (*қўлини ушлаб, сийпайди*). Уни қўй, онангни ўйла, у бизни ёқтириб қолди. Онангдан гапир, Эбин.

Э б и н . Нимани ҳам гапирадим. Мехрибон эди у. Яхши эди.

А б б и (*қўлини елкасига қўяди*, Эбин индамайди. Эҳтирос билан.) Мен ҳам сенинг меҳрибонинг бўламан.

Э б и н . Гоҳо ашула айтиб берарди.

А б б и . Мен ҳам айтаман!

Э б и н . Бу унинг уйи эди. Унинг фермаси, унинг рўзгори.

А б б и . Бу менинг уйим. Менинг фермам, менинг рўзгорим!

Э б и н . Отам уни талон-торож қилиш учун уйланди. У жуда мўмин, беозор хотин эди. Отам қадрига етмади.

А б б и . У менинг ҳам қадримга етмайди.

Э б и н . Ёвузлиги, баттоллиги билан кун-бакун қақшатиб, жонини суурди.

А б б и . У мени ҳам ўлдиради.

Э б и н . Онам бечора ўлди. (*Пауза.*) Гоҳо ашула айтиб берарди. (*Йиглайди*.)

А б б и (*бошини қучиб, эҳтирос билан*). Мен ҳам айтаман. Мен ҳам ўламан, сен туфайли, Эбин. (*Ҳирсу эҳтироси ошиб-тошиб кетаётганига қарамай, овозида, ҳаракатларида — самимий ҳиссиёт, оддий ҳирс билан оналик меҳрининг ашаддий омухтаси.*) Йиглама, Эбин! Мен сенга онанг ўрнида бўлай. Худди онангдай севиб эркалай. Кел, битта ўпай, Эбин! (*Бошини ушлаб ўзига жалб этади, Эбин қаршилик кўрсатгандай бўлади. Эркалаб.*) Тортинма, мен сени худди онангдай ўпаман, хўпми? Сен ҳам ўп, уйқу олдидан ҳар оқшом онанг билан хайрлашгандагидай.

Шошмасдан бир-бирларини ўпадилар. Абби бирдан бебош эҳтиросга берилиб, телбаларча шошиб ўпа бошлайди; Эбин ҳам уни бағрига олиб, узоқ-узоқ ўпади. Кутимаганда, Эбин худди ҳали ўз хонасидагидай уни бирдан кескин четлатиб, даҳшатда қолади.

А б б и (*унга қўй узатганча ёлвориб*). Раҳм қил, Эбин. Мени ташлаб кетма. Кўриб турибсан, мен сенга фақат она бўлибгина қололмайман. Менинг ҳисстүйғуларим она меҳридан кўра каттароқ. Жуда ҳам катта. Муҳаббатим шу қадарки, иккаламизга ҳам етиб ошар, иккаламиз ҳам баҳтли бўла олар эдик, Эбин...

Э б и н (*хонанинг қоронги бурчагига қараб*). Она, онажон! Нима истайсан? Менга нималар демоқчисан?

А б б и . Аббини севгил, деяпти. У менинг муҳаббатимни пайқаб турибди. Иккаламиз ҳам баҳтли бўламиз. Сен шуни фаҳмламаяпсанми? Ана, қулоқ сол — Аббини севгил, деяпти онанг.

Э б и н . Ҳа, сезяпман... балки у... лекин, нега бўлмаса... Ахир сиз унинг ўрнини, унинг уйини, унинг ётофини эгаллаб ўтирибсиз-ку...

А б б и . У сени севишимни билади!

Э б и н (birdan келган ўй уни гангитиб қўяди. Заҳарханда ва тантана билан). Мен тушундим. Нега эканини тушундим... У отамдан қасос олмоқчи. Ўч олиб, кейин гўрида тинч ётмоқчи.

А б б и (ваҳшатда). Қасосли дунё. Биз ҳаммамиз бир-биримиздан ўч оламиз. Онанг — отангдан, отанг — мендан, мен — сендан, сен — мендан, биз яна ундан! Ҳаммамиздан эса худо ўзи қасос олади! Мен сени яхши кўраман, Эбин. Яхши кўришимни худо ҳам билади.

Э б и н (олдидаги тиз чўкиб, сонларини қучиб). Мен ҳам сени севаман, Абби! Биринчи кўрган дақиқамдан бери фақат сени ўйлайман! Энди буни очик айтсан бўлади. Мен сени севаман! (Эҳтиросли бўса.)

ТЎРТИНЧИ КЎРИНИШ

Эрта тонг. Э б и н айвонга чиқади ва дарвоза томон йўналади. Коржома кийган, нимасидир ўзгарган. Ўзидан мамнун, беорроқ назар билан меҳмонхона деразасига қараб, илжайди. Дарвозага етганида дераза очилганини пайқайди. Деразада А б б и кўринади. У энди уйкудан турган, сочлари елкасига паришон ёйилиб тушган, Эбинга ноз билан тикилиб, секин чақиради.

А б б и . Эбин. (Эбиннинг қайрилиб қараганини кўргач, карашма билан.) Битта, биттагина ўпич. Кечгача кўришмаймиз ахир. Қандоқ чидайман.

Э б и н . Мен ҳам ўлгидай соғинаман, нима қилай. (Дераза ёнига келади, Абби эгилади, ўтишадилар.) Бас. Кечасига ҳам қолсин. (Кулади.)

А б б и . Қолади. Сен учун менда ошиб-тошиб ётиби. (Бирдан.) Эбин, мени яхши кўрасанми?

Э б и н . Мен кўрган-билган жононлар ичиди энг зўри сенсан. Ўлай агар!

А б б и . Бу деганинг севаман деганинг эмас.

Э б и н . Севаман, яхши кўраман сени. Бўлдими?

А б б и (мехр билан тикилиб). Ҳа.

Э б и н . Мен кетдим бўлмаса. Ҳозир чол келиб қолиши мумкин.

А б б и (ишонч билан, жилмайиб). Келса келар! Мен унга ҳар қанақа вазиятда чап бериб кета оламан. Деразани очиқ қолдирман, хўпми? Бу хонага кўпдан офтоб тушмаган экан. Энди бу жой меники, майлимни, Эбин?

Э б и н (сал қовоқ солиб). Майли.

А б б и (тузатиб). Бизники.

Э б и н . Ҳа, бизники.

А б б и . Шу кечадан бошлаб. Тўғрими? Бизнинг муҳаббатимиз унга файз киргизди.

Э б и н (бир оз жим туриб). Онам кетди. Энди у қабрида хотиржам ётса бўлади.

А б б и . Хотиржам ётсин. (Нозли зарда.) Эрталабданоқ шунақа ғамгин гапларни гапирма.

Э б и н . Беихтиёр...

А б б и . Ғамгин хотираларни ҳайдаш керак. (Пауза.) Бориб жиндек мизгиб олай. Чол келса, тобим йўқ дейман, нонуштани ўзи тайёрласин.

Э б и н . Ана ўзи келиб қолди. Тепага чиқ, сочларингни тузат.

А б б и . Кўришгунча. Мени унутма. (Ҳаво орқали бўса юборади.)

(Эбин кулиб, елкаларини кериб, отасини кутади. Чандан Кэбот тайдо бўлади. Секин юриб келиб, тўхтайди, кўзларини қисганча осмонга қарайди.)

Э б и н (хушчақчақ). Салом, дада. Кундузи ҳам юлдуз санаяпсанми?

Кэбот (осмонга тикилганча). Чиройли!

Э б и н (атрофга аланглаб). Бўлмаса-чи! Бунақанги ферма ҳеч қаерда йўқ!

Кэбот. Мен осмонни айтяпман.

Эбин (кулади). Э-ха, осмонми. Сен қаёқдан биласан — чиройлими, чиройли эмасми... Кўзинг яхши кўрмаса... (*Уз ҳазилидан мамнун, сонига шанатилаб кулади.*)

Кэбот (қовоги осилиб). Бугун жуда хушчақчақсан? Аzonлаб отиб олдингми, нима бало?

Эбин (соддадиллик билан). Ундан эмас. Шунчаки, тирикчиликдан хурсандман. (*Кўл узатади.*) Ора очиқ, дада. Кўлни ташланг.

Кэбот (хушёр тортиб). Сенга нима бўлди ўзи?

Эбин. Ҳай, яна ўзинг биласан. Балки шуниси ҳам тузукдир. (*Пауза.*) Сенга нима бўлди, деяпсанми? Сен пайқамадингми, у келдию яна кетди... гўрига.

Кэбот. Ким?

Эбин. Онам-да. Энди у хотиржам ётади. Сен билан ҳисоб-китоб қилиб кетди.

Кэбот (ўзини йўқотиб). Мен молхонада эдим, қаттиқ ухлаб қолибман. Сигирлар уйқуга ўч бўлади, мени ҳам ўргатишган.

Эбин (яна масхараомуз хушчақчақлик билан). Яшасин сигирлар! Ҳа, майли. Энди ишинингга бор!

Кэбот (жажл билан). Ҳа? Сен мишиқи энди менга иш буюряпсанми?

Эбин (кулади). Буюраман! Ҳа! Ҳа! Ҳа! Сенга буйруқ ёқмаяптими? Ҳа! Ҳа! Ҳа! Ёқмаяпти! Бу товуқхонанинг зўр хўроси ўзимман, ҳа! (*Кула-кула молхонага жўнайди.*)

Кэбот (қизғаниб, нафрат билан унга тикилиб қоларкан). Онасининг ўзи, қуйиб қўйгандай! Шўринг қурғур! Эси паст деганларича бор. (*Туфлайди.*) Аммо-лекин қорин очиб кетди-ку. (*Эшикка йўналади.*)

Парда

УЧИНЧИ ПАРДА

БИРИНЧИ КЎРИНИШ

Бир йил ўтди. Кўкламнинг сўнгги ҳафтаси. Тун. Иккинчи қаватдаги ётоқхоналарда чироқ хира ёнади — ҳар хонада биттадан шам.

Эбин ўз хонасида, муштини иягига тираб, каравотда ўтирибди. Уни мураккаб, бирбирига зид ҳиссиятлар қийнайди. Пастдаги ошхонадан келаётган қаттиқ қаҳқаҳа, маст-аласт овозлар, музика асабига тегади. Қовоғи солиқ, ерга қараб ўтиради. Қўшни ётоқхонада, кенг каравот ёнода бешик.

Ошхонада хушчақчақлик авжига чиқмоқда. Девор бўйига тизилган курси ва ўриндиқларда фермерлар, уларнинг хотинлари, қишлоқ йигитлари ва қизлар ўтиришибди. Ҳаммаси шовқин солиб гаплашишади, кулишади. Ўртадаги столлар сурилиб, танцага майдон очилган. Орқадаги эшик олдида, бочка билан ёнма-ён Кэбот турибди, анча кайф қилиб қолган, келганларга кружкада виски қўйиб бериб турибди. Улфатлар бир-бирларининг биқинларига тутишиб, кулишади. Кэботга имо қилишади, унга аччиқ киноя, кесатиқ гаплар отишади. Чап бурчакда слласига рўмол ташлаб, тебранма курсида А бби ўтирибди. Ранги ўчиб, кўзлари анча кирта-иб қолган. Кимнидир бесабр кутади, кўзи эшикда.

Орқадаги ўнг бурчакда найнов йигит ўтирибди, юзи ҳам аҳмоқона чўзинчоқ, скрипкаси ни созлайди. Нурсиз кўзлари бетиним липиллайди, кулишида бадниятлик сезилади.

Абби (ёнидаги қизга). Эбин қаёқда, а?

Киз (мазах қилиб). Мен қаёқдан билай, миссис Кэбот? Уни кўрмаганинга минг йил бўлгандир. (*Маъноли қилиб.*) Сиз келганингиздан бери осто-на ҳатлаб кўчага чиқмайди.

А б б и (үйчан). Ҳа-ҳа. Онаси ўрнида онаман.

Қ из. Ҳа, буни ҳам эшитдик, миссис Кэбот. (*Ёнида ўтирган онасининг қулогига шивирлайди.*)

А б б и (бирлас жим ўтиради-да, кейин ёнидаги эркакка мурожсаат қиласди). Мабодо, Эбинни кўрмадингизми?

Э р к а к (юзлари қизарган, кўзлари мойланиб). Йўғ-а, кўрмадим. (*Кўз қисиб.*) Эбиннинг қаёқдалигини сиз билмасангиз, бошқа ким биларди.

А б б и . У қишлоқда энг уста ўйинчи-ку ахир, келиб бир рақс тушсин эди.

Э р к а к (кўз қисади). Эҳтимол бешик тебратаетгандир, а? Ўғил шекили, адашмасам. Қанчалик бўлди ҳозир?

А б б и (паришон, бош иргаб). Икки ҳафталик бўлди. Жуда чиройли, суратдек.

Э р к а к . Ҳамма оналар ўз боласини чиройли деб билади. (*Биқинига туртиб, айёrona шивирлайди.*) Менга қаранг, Абби. Агар Эбин жонингизга тегса, унутманг — мен бор. (*Аёлнинг ифодасиз юзига тикилади, жавоб ололмагандан кейин, мастона гудранниб, ўрнидан туради.*) Билишимча, яна жиндек отиш керак. (*Бир фермер билан моллар ҳақида баҳслашаётган Кэботнинг ёнига боради.*)

(*Ҳамма ичади.*)

А б б и (ўзича). Эбин қаёқда қолди-я? Нима қиляпти экан?

Абби бу сўзларни ҳеч кимга қарамасдан аста айтган бўлса ҳам, яқин орада ўтирганлар эшитишиди, култи-мазах, имо-ишора билан ёнидагиларга оширишиди. Гап скрипкачига етиб келди.

С к р и п к а ч и (Аббига кўз тикиб; бутун хонани янгратиб). Мен биламан Эбиннинг қаёқдалигини. У ҳозир бутхонада шукронага шам ёқяпти.

(*Ҳамма хохолаб кулиб юборади.*)

Э р к а к . Нима муносабат билан? Тушунтириб гапирсанг-чи.

(*Кулги-қийқириқ давом этади.*)

С к р и п к а ч и . Нима муносабат билан бўларди! (*Ўтирганлар тўйиб пичирласин дегандек, узоқ имиллайди.*) Янги туғилган... укасининг шукронасига-да.

Кулги яна портлайди. Ҳамма гоҳ Аббига, гоҳ Кэботга қарайди. Кэбот эшик олдидаги ҳалиги фермер билан ҳамон баҳслашаётган эди. Гап нима ҳақда эканини эшитмай қолди, лекин шундай бўлса ҳам, ҳақоратни сезди. Ўртага чиқади. Бирдан ҳамма жим бўлиб қолади.

К э б о т . Подадаги қўйлардек маърашиб қолдинглар? Мен сенларни есиничсин, ўйнасин-кулсин, деб таклиф қилганман, чақчақлашиб ўтири-да, ахир мундоқ! Сенлар бўлсанг, хушчақчақлик ўрнига, чўчқадай шалтагингга ағанаб, яна курк товуқдай қақиллаганинг қақиллаган!

Ҳамманинг газаби келди-ю, Кэботдан ҳайқишиади.

С к р и п к а ч и (айёрлик билан). Биз Эбинни кутяпмиз.

(*Босиқ кулги.*)

К э б о т (ошкора тантана билан). Эбиннинг кераги йўқ! У билан орамиз очиқ. Мен ўғил кўрдим. Ўғил! (*У маст, шунинг учун кайфияти кескин ўзгариб туради.*) Эбидан кулишга ҳақларинг йўқ! Тушундингми? У фирт аҳмоқ бўлса

ҳам, ўз пушти камаримдан. У сенлардан минг марта яхши. Куни билан эшакдай ишлайди, мендан кам эмас. Иш деганда унинг олдида биттанг ип эшолмайсан.

Скрипкачи. У кечалари ҳам ёмон ишламайди, чоғи.

(*Қаҳқаҳа.*)

Кэбот. Кул, кулавер, лаънати хомкаллалар. Галинг түғри, ғижжакчи. Зарур келса, у худди мендек, кечаю кундуз ишлайди.

Қари фермер (*зўрга оёқда турибди, соддалик билан*). Сен билан ҳеч ким тенглашолмайди, Эфраим. Етмиш олти ёшингда ўғил кўрдинг-а! Мен энди олтмиш еттига қадам қўйдим — ундан ишлар хаёлимга келмайди.

(*Ҳамма кулади, Кэботнинг ўзи ҳам кулади.*)

Кэбот (*қари фермернинг елкасига қоқиб*). Сенга ачинаман. Шундай йигит-а, ўйламагандим мижозинг бундай заиф деб.

Қари фермер. Мен ҳам сени бундай бақувват деб ўйламагандим, Эфраим.

(*Кулги.*)

Кэбот (*бирдан қовоги осилиб*). Куч-кувват деганинг менда ҳали топилади. Жуда кўп. Шундай кўпки, сенлар тасаввур ҳам қилолмайсан. (*Скрипкачига.*) Нимага турибсан тўнгакдай қаққайиб! Тўйга чақирганман ахир сенларни! Чал, ўйнаймиз! Сайрат ғижжагингни. Тирсагингни мойлаб олиб, қорнига ишқа!

Скрипкачи (*қари фермер узатган вискини ичиб олиб*). Бўпти, бошладик. (*Чалади.*)

Тўрт йигит билан тўрт қиз рўбарў туриб, музика оҳангига мос ўйнаб кетадилар, скрипкачи эса ҳар замонда қийқириб, ўйинчиларга ҳазил-мутойиба гаплар отади. Ҳамма қарсак чалиб, товонини тақиллатади. Айниқса, Кэбот зўр бериб ўйнайди. Фақат Абби ўйинга лоқайд, эшикдан кўз узмай ўтирибди.

— Жимми, жононни ўнгга бур! Ҳа, ана! Белидан олсанг-чи! Маҳкамроқ, кўрқма, онаси кўрмайди.

(*Кулги.*)

Жононларни алмаштиринг, тез! Эсси, энди хурсандмисан? Ёки Руби сенга кўпроқ ёқадими? Ёноқлари ёниб кетялти, қаранглар! Қандингни ур, умр қисқа, ёшлигингда қучоқлаб қол!

(*Кулги.*)^{*}

Кэбот (*поинасини тақиллатиб*). Қани, йигитлар, кўрсатиб қўй, ўйиннинг қанақа бўлишини! Қизлар, бўшаашма!

Скрипкачи (*кўз қисиб*). Етмиш олтига кирганларни кўп кўрганман, лекин сизга етадигани йўқ, Кэбот! Бироқ кўзлар жиндек панд бериб қўйяпти, чамамда.

(*Босиқ кулги.*)

(*Кэботга жавоб қилишга имкон бермай давом этади.*) Айланинглар! Сара, сен қаллифи ташлаб кетган келинга ўхшаб лаллайма! Чақонроқ, чақон-

роқ, бошни күттар! Худо урди. Жонни Қўкка қаранглар, оёғини зўрға судрайди-я! Бу аҳволда эртага қандоқ ишга чиқади!

(*Кулги.*)

Кэбот. Қани, қани! Бўшашма! (*Ўзини тутолмай, даврага ёриб киради, қўлларини силтаб.*) Йўл бер! Кенгроқ ол даврани! Мен ўзим қўрсатаман ўйининг зўрини! Шу ҳам ўйин бўлдими, латтага ўхшайсанлар! (*Даврани суради.*)

(*Ҳамма девор томон тисарилиб, Кэботга фижиниб қарайди.*)

Скрипкачи (*жўрттага*). Қани, Эфраим, ол! (*Чалади.*)

Кэбот ўйнай бошлайди. Анча яхши, завқли ўйнаб келиб, кейин ўзига ярашмайдиган, ўзи эпломаган ҳаракатларга зўр беради: сакрайди, пошналарига шапати уради, даврани гир айланади. Ергача эгилади, гердаяди, маймундай қилиқлар қиласди. Ёввойи ҳиндулар ўйинига ўхшаш бу ҳаракатларига жўр бўлиб қийқиради ҳам.

Кэбот. Ҳо-о-п! Кўриб қўйинг! Етмиш олти ёшдаман! Темирдай мустаҳкам! Менга бас келиб бўпсан! Менга тараф йўқ, кўриб қўй! Юзга кираман, айтиб қўяй! Юз йиллик тўйимга таклиф қиласдим-у, лекин у вақтларгача сенлар биттанг қолмай қирилиб кетасан. Мижози заиф авлодсанлар. Томирларингда қон эмас, совуқ сув оқиб ётибди. Ҳо-о-п! Кўриб қўй! Хотин-қиз дикқатига лойиқ биттаю битта эркакман. Мен ҳиндулар билан жанг қилиб юрганда сенлар ҳали дунёда йўқ эдинг. Мен шафқатсиз жанг қилганман. Ҳо-о-п! Баданим тўла яра, ямоқ, очиб кўрсатайми? Гала-гала ҳиндулар қувган мени, югурадим-у, орқамда, қоқ курагимнинг ўртасида найза ликиллаб бораради. Лекин бари азобларим учун қасос олганман! Қонга қон, жонга жон — бизнинг шиоримиз эди. Ҳо-о-п! Мана, кўриб қўйинглар! Калла қилиб шипни тешоламан! Ҳо-о-п!

Скрипкачи (*ҳолдан тойиб, камончасини ташлайди*). Етар, қўлим толди. Ҳақиқатан ҳам алвости экансан, Кэбот!

Кэбот (*ўзидан мамнун*). Демак, сен ҳам таслим бўлдинг! Лекин яхши чалдинг, мана ич! (*Унга ҳам ўзига қуяди.*)

Ичадилар. Атрофдагилар совуқ, ёвқараш қилишади. Мудҳиш жимлик. Скрипкачи нафас ростлайди. Кэбот бочкага суюниб, оғир нафас олганча, атрофга аланглайди.

Тепада Эбин каравотдан туриб, оёқ учида хонадан чиқади. Тез орада кўшни ётоқхонада пайдо бўлади. Аста, ўгринча бешикка яқинлашади ва болага тикилиб қолади. Юзида гоҳ паришонлик, гоҳ хижолат, гоҳ меҳр ифодаси. Эбин бешикка яқинлашган пайтдан бошлаб Абби жонсарак. У ортиқ тоқат қиломай, Кэбот ёнига боради.

Абби. Мен юқорига чиқиб, болага қарай.

Кэбот (*эркалаб*). Ҳали дармонинг йўқ. Қарашворайми?

Абби. Йўқ, йўқ, ўзим. Ҳозир тушаман.

Кэбот. Ўзингни уринтириб қўйма. Ўғлимизга кераксан-а, ёдингдан чиқмасин. (*Эркалаб жилмайганча, орқасини силайди.*)

Абби (*унинг қўли текканда сесканиб*). Керак эмас, қўй. Мен кетдим... (*Кетади.*)

Кэбот изидан қараб қолади. Атрофдагилар шивирлашади. Кэбот қайрилиб қараганда яна ҳамма жим бўлади.

Кэбот (*ҳали нафаси тез, пешанасида шаррос тер*). Жиндек бош айланяпти. Эшикка чиқиб тоза ҳаво олай. Фижжакчи, сен чал. Ўйнанглар, ашула ай-

тинглар. Мана (*бочкани муштлаб*), бу ерда ҳали бор. Яйрайверинглар. Мен ҳозир кираман.

(*Эшикни ёпиб, чиқиб кетади.*)

Скрипкачи (ачитиб). Бизни деб шошмай қўяқол.

(*Босиқ кулги.*)

(*Аббига тақлид қилиб.*) Эбин қаёқда?

(*Кулги.*)

Аёл (баланд овоз билан). Бу уйда нималар бўлиб ўтгани — икки карра иккидай аён. Бошқача бўлиши ҳам мумкин эмасди.

Ётоқхона эшигига Абби пайдо бўлади. У тўхтаб, меҳр-муҳаббат тўла кўзлари билан Эбинга тикилади. Эбин уни кўрмайди.

Эрекақ . Жим. Эҳтимол эшик орқасида қулоқ солиб тургандир. Унинг қўлидан келади.

Ҳаммаёқ шивир-шивир — худди шабада ҳазон супураётгандай. Кэбот айвондан тушиб, дарвозага суюниб тўхтайди. Кўзини қисиб кўкка қарайди. Абби сассиз келиб, Эбиннинг ёнида туради.

Эбин (сесканиб). Абби!

Абби . Жим. (Уни қучади, ўшишадилар, кейин бешик узра бош эгадилар). Чиройли йигит бўлади. Худди сенинг ўзингдай.

Эбин (мамнун). Шунаقا дегин? Унчалик эмасдир.

Абби . Куйиб қўйгандек.

Эбин (хўмрайиб). Бу менга ёқмаяпти, Абби. Нимаики меники бўлса унга қараашли бўлади. Бир умр шундай. Бас қилиш керак.

Абби (бармолини лабига босиб). Сабр қилиш керак, Эбин. Сабр-тоқат билан қутиш керак. Бир ҳодиса юз бериши бор-ку. (Уни қучиб.) Мен энди пастга тушай.

Эбин . Мен ҳовлига чиқаман. Бу фижжак билан бу қаҳқаҳани эшитишга тоқатим қолмади.

Абби . Ўзингни қўп қийнама, жоним. Мен сени яхши кўраман. Яхши кўраман, уқдингми? Ўп мени.

(*Улар қучоқлашганча бешик устидиа узоқ турадилар.*)

Кэбот (ҳовлида). Нимагадир кўнглим фаш. Ҳатто музика ҳам таъсир қилмаяпти. Қаерга борсам, шу фашлик кўксимни фижимлайди. Қоронги бурчакларда ҳам, қайрагочнинг шовуллашида ҳам шу фашлик яшириниб турганга ўхшайди, тарновларни фижирлатиб тирнагандай, томда сирғаниб юргандай... Ҳамма жойда фашлик, қочиб кутулиб бўлмайди. Уйда ҳам, одамлар орасида ҳам ҳаловат йўқ. (Уҳ тортиб.) Бориб, бир моллар билан гурунглашай, ўшалар тузук... (Хоргин юриб, молхонага кетади.)

Скрипкачи . Менга қаранглар, энди бир қайф-сафо қиласлик,— у кетди! Бу аблажни қариганида роса аҳмок қилишибди! Шуни бир ювайлик! (*Камончасини торларига зарб билан уради.*)

(*Ҳақиқий ҳушчақчақлик бошланади. Ёшлар ўйинга тушадилар.*)

ИККИНЧИ КҮРИНИШ

Ярим соат ўтди. Эбин дарвоза ёнида туриб, осмонга тикилади. Юзіда дард ифодаси. Молхонадан Кәбот чиқади. Оғир босиб, салмоқ билан юриб келади, бошини қуиін солған. Эбіннің күрганида юзида қаҳрли, тантанали кулгу пайдо бўлади. Ўглининг ёнидан ўтаётіб елкасига қоқади. Ошхонадан эса ҳали ҳам маст-аласт овозлар, кулги, музика эши билади.

Кәбот. Сен буёқда экансан-да?

Эбин (*сесканиб, нафратли назар ташлайди, түнг*). Ҳа.

Кәбот (*мазах қилиб*). Базмда күриммадинг? Ҳамма сўрайди, Эбин қани, Эбин қани.

Эбин. Сўраса сўрабди-да.

Кәбот. Яхши-яхши қизлар ҳам бор эди.

Эбин. Тошини терсин.

Кәбот. Биронтасига уйланиб олсанг бўларди.

Эбин. Уйланмайман.

Кәбот. Бадавлатроғига чанг солсанг, рўзгорини бўлишиб олардинг дейман-да.

Эбин (*кулиб*). Сенга ўхшабми, а? Менга унақаси қетмайди.

Кәбот (*қаттиқ ботди*). Ёлғон! У онангнинг уруғлари эди менинг фермамга чанг солмоқчи бўлган.

Эбин. Одамлар бошқача гапиришади. (*Бир оз жум қолгач, ўчакишиб*.) Менинг ташвиш тортадиган жойим йўқ, рўзгорим тайин.

Кәбот (*масхараомуз*). Қаерда экан ўша рўзгорингиз, агар сир бўлмаса?

Эбин (*қўлларини ёйиб*). Мана.

Кәбот (*бошини орқага ташлаб, хохолаб кулади*). Оҳ-ҳо! Рўзгори бор эмиш! Ҳай-ҳай-ҳай! Ярамаснинг гапини қаранглар-а!

Эбин (*ўзини босиб, хўмрайганча*). Ҳа, майли — кўрармиз.

Кәбот (*фикрини билмоқчи бўлгандай шубҳа билан қараб туради. Пауза. Кейин ишонч билан*). Мен-ку, кўрарман. Лекин, мана сен... Сен ҳали қўзи очилмаган кучукваччасан, ахир!

(Эбин кулади.)

Нимага тиржаясан?

(Эбин жавоб бермай, тескари қарайди.)

(Жаҳлга миниб.) Ё худойим-эй! Фирт аҳмоқсан, ҳей! Каллангда бир чакса кепак, ҳа! (*Эбин бу гапларга лоқайд турганидан ғазаби келади*.) Агар туғилганингданоқ эси паст эшшак бўлмаганингда аллақачон тушунардингки, бу ерда сенга ҳеч нарса тегмайди. На бир қарич ер, на биронта тош! Айниқса ҳозир, мен ўғилли бўлганимда. Ана, ичкарида ётибди меросхўр, ўлганимдан кейин ферма унинг қўлига ўтади. Лекин ҳали мен юзга кираман, юзга кириб ҳамманин аҳмоқ қиласман, ҳа. Унгача бу гўдак ҳам мана сендей бўлиб қолади.

Эбин (*ўчакишиб кулади*). Қаранг-га!

Кәбот (*дарғазаб*). Қаранг эмиш! Сен ҳали ҳам умидвормисан? Лекин ферма фақат уники эмас, Аббини ҳам бўлади. Аббини эса лақиллатолмайсан. Ифлос ниятларинг унга аён, у сени беш қўлдай билиб олган. Мени фаҳмламайди деб ўйлайсанмӣ, унинг атрофида гир айланиб, сўлагингни оқизиб... У менга ҳаммасини ҳикоя қилиб берган. (*Мушт ўқталади*.) Сен... сен... мияси ачиған аҳмоқ!

Эбин (*у ҳам ғазабда устига босиб боради*). Ёлғон, ёлғон гапиряпсан! Абби ундей дейиши мумкин эмас!

Кәбот (*Эбіннинг қалтираганини кўриб, тантана қиласди*). Мумкин эмас? Мен сенинг миянгни янчид, мана бу қайрафочлар тепасига сочвораман, де-

ганимда у: «Йүқ, бу ақлдан әмас, унда рўзгордаги ишни ким қиласди?» — деб туриб олди. Кейин айтдик, биз ўғил кўришимиз керак, деди. Мен ҳам, агар ўғил туғиб берсанг, истаган нарсангни сўрайвер, деб ваъда қилдим. Унинг бирдан-бир тилаги шу бўлдик, мен ўлгандан кейин ферма унинг қўлига ўтиши учун сени бу ердан йўқотишимиз керак. (*Заҳарли илжайиб.*) Шундай қилиб, ферма энди уники, сенинг улушинг эса — ана, катта йўлнинг тўзони. Канча хоҳласанг олавер!

Э б и н (*даҳшатда лол, мусибат ва ғазабдан тош қотиб, кейин бирдан қаҳқаҳа— ота бошлиди, томирлари тортишади*). Ҳа-ҳа-ҳа! Ҳа-а, унинг ўйини шунақа дегин? Ўзим ҳам гумонсираган эдим-а... Бошдаёқ гумонсираганман... Аммо мен... хўш, демак, ҳаммаси ёлғон экан-да? (*Бақириб.*) Бари ёлғон! Ўлдираман уни! (*Айвонга югурди.*)

К э б о т (*йўлини тўсив*). Қани, унга қўл тегизиб кўр-чи!

Э б и н . Йўлимни тўсма!

Эбин уни итариб четлатмоқчи, аммо Кэбот уни қўлидан маҳкам ушлайди. Шиддатли олишув бошланади. Чол Эбингдан анча кучли. У ўглини бўғзидан олиб, деворга сиқиб қўяди. Бу маҳал айвонда Абби пайдо бўлади.

А б б и (*чинқириқ қўксидан отилиб*). Эбин! Эбин! (*Зинадан югурниб тушади.*) Эфраим! (*Чолнинг қўлига осилади.*) Кўйвор уни, Эфраим! Ўлдириб қўясан!

Кэбот панжасини бўшатиб, ўглини қаттиқ итариб юборади, Эбин нарироққа сурилиб бориб йиқилади. Зўрга нафас олиб ётганида Абби дод солиб тиз чўкади, бошини тиззасига олмоқчи бўлади. Лекин Эбин уни итариб юборади.

К э б о т (*тантана қилиб*). Қўрқма, Абби, уни ўлдириш ниятим йўқ. Дорга осилиб ўлиб кетишга арзимайди. Мен етмиш олтига кирдим, бу ҳали ўттизга ҳам боргани йўқ, аҳволини қара, мен билан олишиб ўтирибди тағин! Мен билан-а! Осон деб ўйладингми мен билан беллашишни? Анов юқорида бешикда ётган билан ҳам беллашолмайсан. У ҳам менга ўхшаган чайир бўлади. Парвариш қиласман уни, тарбиялайман. Энди эса, мен кетдим — хушчақчақлик қилишим керак — бугун менинг байрамим. (*Айвон томон юради, кейин орқасига қайрилиб, кулади.*) Энди юраги дов бермайди-ку, лекин агар бу аҳмоқ сенга яна хиралик қиласиган бўлса, мени чақир. Худо ҳақи, иштонини тушириб, хипчин билан таъзирини бериб қўяман. (*Ўйга кириб кетади, бирпастдан кейин эса унинг «Хо-о-оп!» деган қийқириги эшишилади.*)

А б б и (*ачиниб*). Эбин... оғридими, жоним? (*Уни ўтмоқчи бўлади.*)

Э б и н (*уни итариб юборади, ўтиради, бошини кўтариб, атрофга қарайди, кўзини олайтириб, хирқироқ овоз билан*). Жўна бу ердан!

А б б и (*ҳайрон*). Бу — менман, Эбин! Нима бало, мени танимай қолдингми?

Э б и н (*нафрат билан қараб*). Аксинча... сени энди яхши таниб олдим! (*Хўнграб ийглайди.*)

А б б и (*қўрқиб*). Нима бўлди, Эбин? Нега менга бундай ғалати қарайсан?

Э б и н . Нафратланаман еендан! Кўргани кўзим йўқ... Фоҳишасан, найрангбоз фоҳиша!

А б б и (*даҳшатда, орқага тисарилиб*). Эбин!.. Нималар деяпсан?

Э б и н (*туриб*). Сенинг ҳар бир сўзинг ёлғон! Сен мени ҳамиша алдаб келгансан. Биринчи учрашувимиздан тортиб. Яхши кўраман деганларинг...

А б б и (*самимий*). Ҳа, сени яхши кўраман... (*Кўлини ушламоқчи, лекин Эбин қўлини тортиб олади.*)

Э б и н (*яна ўзиникини таъкидлаб*). Ёлғон! Сен мени аҳмоқ қилиб юргансан. Мен эшшакмия, сенга ишониб ўтирибман... Сен эса унга сари илондай қўйнимга кириб, маккорлигининг давом эттирдинг. Ўғил туғиши учун мени

тўшагингга судрадинг, бу бўлса болани ўзиники деб юрибди. Кейин эса, мени уйдан ҳайдатиб, фермани эгаллашга чолдан ваъда олгансан. (*Нафрат билан.*) Сен ялмоғизсан, инсон боласи бу қадар қабиҳ бўлиши мумкин эмас.

А б б и (ҳанг-манг бўлиб). Шу гапларни унинг ўзи айтдими?

Э б и н . Айтса-айтмаса, шундоқ эмасми? Жилла бўлмаса бир оғиз рост гапир!

А б б и (ёлвориб). Эбин, гапимга қулоқ сол. Сен ҳамма гапларимни яхшилаб эшитиб олишинг керак. Бунга анча бўлган... У маҳал сен Минниникига қатнаб юрардинг, мени кўргани ҳушинг йўқ эди... Мен эса сени севардим. Жинни бўлишимга сал қолган, ҳатто сендан қасос олмоқчи бўлганман...

Э б и н (гапни бўлиб, эҳтирос қийногида). Ўшанда ўлиб кетганинг маъқул эди. Иккаламиз ҳам ўлиб кетсак бўлмасми! Бу гапларни билмаган, эшитмаган бўлардик... (*Дарғазаб.*) Лекин сендан барибир қасос оламан. Онам қайтиб келиб, иккалантн ҳам лаънатласин, худодан илтижо қиласан.

А б б и (нафаси ичига тиқилиб). Ундан қилма, Эбин! Ундан қилма! (*Оёғига ииқилиб, ииғлайди.*) Мен сенга ҳеч ёмонлик истаган эмасман. Кечир мени!

Э б и н (унинг сўзларини эшиштмай, газабда). Мен у қари қирчанги билан барибир ҳисоб-китоб қиласан... Сен билан ҳам! Кейин иккалантн ёлғиз ташлаб кетаман, бир-бирингнинг гўштингни гажиб ётавер, кечалари ётоФингга онамнинг арвоҳи келади... Мен эса Калифорнияда, Сим билан Питернинг ёнида бўламан.

А б б и (даҳшатда). Йўқ, мени ташлаб кетмайсан! Шафқат қил, Эбин!

Э б и н (қатъий). Кетаман дедимми кетаман. Бойиганимда бир қайтиб келиб, фермамни довлаб оламан. Иккалантн ҳам итдай улоқтириб. Ану ўғлингни ҳам бирга қўшиб ҳайдайман! Тиланчилик қиласанлар, ахлатхоналарни титкилаб юриб, ўлиб кетасанлар! (*Тутқаноқ тутгандай асабий.*)

А б б и (қалтираб, мутеълик билан). Менинг ўғлим — сенинг ҳам ўғлингку, Эбин.

Э б и н (дард чекиб). Дунёга келмагани маъқул эди. Кўзларим кўр бўлсин эди уни кўргунча. Сен уни ифлос ният билан туққансан. У дунёга келиши билан ҳамма нарса алғов-далғов бўлиб кетди.

А б б и (мехр билан). У пайдо бўлмасдан аввал менинг севгимга ишонармидинг?

Э б и н . Каламушдай кўр бўлганман.

А б б и . Энди бўлса ишонмайсан, шундайми?

Э б и н . Сендай ўғри маккорга ишонарканми?

А б б и (сесканади, кейин мутеълик билан). Авваллари-чи, унгача, севармидинг мени?

Э б и н (нафаси тиқилиб). Сен мени лақиллатгансан.

А б б и . Энди ортиқ севмайсанми?

Э б и н (дарғазаб). Нафратланаман сендан!

А б б и . Бу ердан кетишинг, мени ёлғиз қолдиришинг, барининг сабаби — ўша болами?

Э б и н . Гапни йигиштири. Азонда жўнайман. Ер ютсин агар шу гапимда турмасам.

А б б и (паузадан сўнг). Агар муҳаббатингни хазон қилган, сени мендан айириб, кўз очиб кўрган баҳтимдан, яккаю ёлғиз осмондай тиниқ қувончимдан жудо қилган ўша ўғлимиз бўладиган бўлса... агар ҳаммасига сабаб шу бўлса... ўша оқ сут берган боламни нафратлайман.

Э б и н (алам билан). Ёлғон! Сен уни яхши кўрасан. Чунки у туфайли сен рўзгорли бўласан, боланг сенга фермани ўғирлаб беради. (*Қалтираб.*) Гап рўзгорда эмас, тушун! Сен мени алдадинг. Севаман деб қасам ичдинг, шу рўзгорни деб қасамхўрлик қилдинг.

А б б и (ақлдан озгандай). У ўғри эмас!!! Мен уни ўлдираман! Мен сени яхши кўраман. Сенга буни исбот қиласан...

Э б и н (кескин). Бас қил ёлғонингни! Менга бари аён! Хайр. Биз қайтиб юз кўришмаймиз.

А б б и (докадай оқарди). Шунча муҳаббатимиз ҳурмати... ақалли бир марта ўпид кет, Эбин.

Э б и н (дагал товуш билан). Истамайман! Қачонлардир сенга тикилиб қарагланларимни унугтишга ҳаракат қиласман!

А б б и . Эбин! Бирпас сабр қил! Шундоқ кетаверасанми... сенга айтадиган гапим бор...

Э б и н . Ану улфатлар ёнига кетдим — ичаман, ўйинга тушаман.

А б б и (қўлига ёпишиб, қизгин). Бордию орамизда у бўлмаса-чи, бордию мен фермани олиш ниятим йўқлигини сенга исбот қиласам-чи? Биз илгари-гидек бир-биримизни севармидик, худди яқингинадагидек баҳтли бўлармидик? Агар исбот қиласам, мени яна илгариgidек севармидинг, ташлаб кетмасмидинг? Айт!

Э б и н (таъсир қилди). Эҳтимол. (*Унинг қўлини силтаб ташлаб, аламзада жилмаяркан.*) Аммо сен худомидингкӣ?..

А б б и (хурсанд). Лекин эсингдан чиқмасин, сўз бердинг. (*Аста.*) Худо бўлмасам ҳам, баъзи ишлар менинг ҳукмимда...

Э б и н (разм солиб). Сен алаҳлай бошладинг чофи. (*Айвон томон юради.*) Мен кетдим — хушчақчақлик қиласман.

А б б и (орқасидан қичқириб). Мен сенга исбот қиласман. Исбот қиласман-ки, менинг муҳаббатим...

(*Сўнгги сўзларни Эбин эшилмади, уйга кириб кетди.*) (*Ўрнида қотганicha туриб, изидан тикилади; товушида изтироб...*) Менинг муҳаббатимдан зўр куч йўқ дунёда!

УЧИНЧИ КЎРИНИШ

Эрта тонг. Саҳнада ошхона ва Кэботнинг ётоги кўринади. Э б и н ошхонада, стол ёнида иягига таяниб ўтириби. Кўзларида маъно, юзида қон йўқ. Шам пирпираб ёнади. Эбиннинг оёғи остида чит сафархалта.

Тепада, хира ёритилган хонада Кэб о т ухлаб ётиби. Абби беланчак узра бош эгиб, қулоқ солади. Кўзларида даҳшат ва изтироб, ҳўнграб юборади, беланчак ёнида тиз чўкмоқчи. Бу пайт Кэбот уйқусираб инграйди, ёнбошига ағдарилади, шунинг учун Абби ўзини кўлга олиб, эшик орқасида фойиб бўлади. Жимлик. А б б и ошхонага отилиб киради, Эбинни қутоқлаб, эҳтирос билан ўпа бошлайди. Эбин қимир этмай ўтириби, олдинга тикилган кўзлари ифодасиз.

А б б и (телбанамо). Мен сўзимнинг устидан чиқдим, Эбин! Сени дунёда ҳаммадан ортиқ севишимни исбот қилдим. Энди мендан гумонсирашинг учун ҳеч қандай асос йўқ.

Э б и н (лоқайд). Энди бунинг ҳеч қандай аҳамияти йўқ. Ҳар нима қилган бўлсанг ҳам.

А б б и (ақлдан озгандай). Ундай дема, Эбин. Ўп мени. Ўп — ҳозир бу менга жуда ҳам зарур. Сени яхши кўраман, дегин!

Э б и н (ёногига лабини тегизиб). Охирги марта. Мен ҳозир кетаман.

А б б и . Йўқ-йўқ! Энди-я?.. Энди ҳам кетмоқчимисан?

Э б и н (ўзича). Мен кўп ўйладим... Отамга ҳеч нарса айтмайман. Онам бўлса кечалари ётогингга қатнайди — ундан қутулолмайсан. Отамга ҳамма нарсани айтсам, у болани ёмон кўриб қолади, бутун аламини ундан олади. (*Овози майинлашади.*) Мен буни истамайман. Болада айб йўқ. (*Ғалати гуурур билан.*) У менга ўхшайди. Мана, худо ўртада — бола менини. Бир кун эмас бир кун балки қайтарман...

А б б и (гапга тушунмайди, ўз азобли ўйлари билан банд; ёлвориб). Сенинг кетиб қолишингга энди ҳеч сабаб йўқ. Ҳеч қандай сабаб бўлмагандан кейин,

кетишдан нима маъно... Энди ҳамма нарса илгариgidай... орамизга раҳна соладиган ҳеч ким йўқ, Эбин.

Э б и н (*унинг овозидан ҳавотирга тушади. Унга ҳайиқиб тикила бошлайди*). Сен қалтираб кетяпсан, рангинг оқариб кетибди. Нима иш қилиб қўйдинг?

А б б и . Мен... мен... уни ўлдирдим.

Э б и н (*ҳанг-манг бўлиб*). Ўлдирдим?

А б б и (*маъносиз қараб*). Ҳа.

Э б и н (*бир оз жимлиқдан кейин, бирдан уйюнгандек*). Ҳай, бўлар иш бўпти! Қилмишига яраша. Лекин нима қилиб турибмиз, бирон чорасини кўриш керак. Шундай қилиш керакки, гўё у ўзини ўзи... мастиликда... Кеча унинг ҳўқиздай ичганини ҳамма кўрган, гувоҳлик беришади.

А б б и (*бақириб*). Йўқ! Йўқ, Эбин! Мен уни эмас... (*Ақлдан озгандаи кулади*.) Уни ўлдиришим керак эди-ю, яхшироқ ўйламапман! Нега сен ҳам бир оғиз айтмадинг?! Нега?

Э б и н (*қўрқиб*). Кимни ўлдирдинг? Гапир! (*Пауза*.)

А б б и . Уни эмас.

Э б и н (*юзи ўликдай оқариб кетади*). Гўдакними?

А б б и (*маъносиз*). Ҳа.

Э б и н (*birdan oёgi кесилгандай тиз чўкади, титроқ овоз билан*). Ё раббий! Онажон, сен қаёқда эдинг, нега уни тўхтатмадинг?!

А б б и (*содда қилиб*). Ўша биринчи кечамиз кетганича онанг қайтиб келмаган.

(*Пауза. Эбиннинг боши эгилиб тушади, вужуди титрайди. Дунёдан кечган-дек*.) Мен уни ёстиқ билан босдим. Нафаси тўхтаб қолди. Бўғилиб ўлди. (*Аста ииғлай бошлайди*.)

Э б и н (*газаб ва мусибат билан*). У менга ўхшар эди. У меники эди, лаънат сенга!

А б б и (*бўғиқ, тумилиб*). Мен буни истамаган эдим... бу ишни қилаётганимдаёқ ўзимга нафратим келиб кетди. Мен уни яхши кўрардим, у худди сендеқ чиройли эди, аммо мен сени ортиқроқ севардим. Сен эса кетаман дединг. Узоқларга... Сени бир умр кўрмай ўтардим. Ўполмас эдим сени. Ёнингда бўлолмасдим. Ўша бола туфайли мени ёмон кўриб қолдинг. Уни ҳам ёмон кўраман дединг, ўлиб қўяқолсайди, дединг. Ўша бўлмаса ҳамма нарса илгариgidай яхши бўларди, дединг.

Э б и н (*бу гаплар ханжардай ботади, ўзини тутолмай туриб кетади. Аббининг бўғзига чанг солмоқчи бўлади*). Ёлғон! Мен ундаи деганим йўқ! Хаёлимга ҳам келган эмас! Унга озор етказгандан кўра, мен бўғзимга пичоқ тортмасмидим!

А б б и (*тиз чўкиб ёлворади*). Менга азоб берма, Эбин, кўзларингдан нафрат сачраяпти! Сен туфайли, ўзимиз туфайли шундай ишни қилаолганимдан кейин... Мен яна баҳтли бўлишимизни истаган эдим.

Э б и н (*газаб билан*). Ўчир овозингни, ёки ҳозир чопиб ташлайман! Мен сенинг кирдикорларингни кўриб турибман — яна ўша макр. Сен қотилсан, сен гўдакни бўғиб ўлдирдинг — энди бўлса бутун айбни менга тўнкамоқчисан!

А б б и (*қулоқларини бекитиб, инграйди*). Бас қил, Эбин!... (*Оёқларини қучмоқчи бўлади*).

Э б и н (*даҳшат ичидан тисарилиб*). Кўлингни торт! Сен мудҳиш мажлуқсан! Бегуноҳ, мургак чақалоқни ўлдиришга қандай қўлинг борди? Иблисга сотилгансан! (*Яна газаби ошиб*.) Уни нега ўлдирганингни биламан. Менинг сўнгги илинжимга қасд қилгансан. Кўрдингки, бола менга тортган, кўрдингки, у — меники. Сен мана шунинг чидай олмагансан! Мен сени биламан. Сен болани шунинг учун ўлдирдингки, у — меники эди! (*Ақлдан озгандаи тўлғанади, Абби ёнига отилиб келиб, мушт ўқталади*.) Лекин қасос оламан сендан! Полицияга хабар қиласман. Ҳеч нарсани яширмай, барини айтиб бераман-у,

кейин жүнайман. Калифорнияга... у ерда олтин, олтин сочилиб ётибди. Кетаман! (*Гапи узук-юлуқ, гоҳ түнгиллайды, гоҳ бақиради.*) Ҳозир полицияга бораман. Олиб кетсин, авахтага ташласин. Күрарга күзим ийқ. Қотил, үғри! Энди карашмаларинг кетмайды, полицияга топшираман! (*Ииғлаб чиқиб кетади, зинадан югуриб тушиб, дарвозага йұналади.*)

А б б и (*туриб, эшикка отилади, изидан қичқириб*). Эбин, мен сени яхши күраман! Әшитяпсанми, севаман сени! (*Дармонсиз, эшикка сұяниб қолади.*) Нима қилсанг, менга барибир, фақат илгаригидек севсанг бас. (*Эшик кесакисини зұрга ушлаб, полга әмаклади.*)

ТҮРТИНЧИ КҮРИНИШ

Бир соат ўтди. Бундан олдинги күринишдагидек, саңнада ошхона ва Қэботнинг ётоқхонаси. Тонг оттан. Қүёшнинг илк нурлари қайрағочларнинг учини ёритади.

А б б и ошхонада юзини кафтлари билан түсіб ўтирибди. Юқорида Кэбот түшагида ёнбошига ағдарилади, бирдан сесканиб уйғонади, деразадан қарайди, нимадандир ҳайратда, күрпасини асабийлик билан иргитиб, шоша-пиша кийина бошлади.

К э б о т (*Аббини ёнида деб үйлаб*). Менга қара, Абби. Кейинги эллик йил давомида бундай кеч турган эмасман. Офтоб чарактаб ётибди-ку! Э, ичкилиги ҳам, базми ҳам қуриб кетсин. Үзим ҳам қарыб қолдым, шекилли. Эбин битта ўзи ишлаёттан бўлса керак. Уйғотиб қўйсанг бўлмайдими, Абби. (*Ёнида Абби йўқлигини кўриб, ҳайрон.*) Қаёққа кетди бу? Нонушта тайёрлаётган бўлса керак. (*Оёқ учида бешик ёнига келади.*) Ассалом, ўғлим, яхши ухладингизми? (*Бешикка фахр билан тикилади.*) Үглимиш чиройлик-да, ухлашини қаранг... Бошқа болалардек кечаси ғингшиб безовта ҳам қилмайди. (*Хонадан аста чиқиб, ошхонага тушади, Аббини кўриб, кўнгли тинчийди.*) Бу ёқда экансан-ку. Нонушта тайёрладингми?

А б б и (*қимирламай*). Йўқ...

К э б о т (*ёнига келади, эркалаб*). Мазанг йўқроқми?

А б б и . Йўқ.

К э б о т (*қўлинин елкасига ташлайды, хотин сесканиб кетади*). Жиндеқ ётиб турсанг бўларди. Ҳадемай ўғилчамиз уйғониб, «мамма» деб қолади. Жа иштаҳаси зўр-да...

А б б и (*сесканади, кейин совуқ*). Энди у ҳеч қачон уйғонмайди.

К э б о т (*қувноқ*). Йўқ, у узоқ ағанаб ётмайди, менга ўхшаган.

А б б и . У — ўлик.

К э б о т (*гаранг*). Нима?

А б б и . Мен уни ўлдириб қўйдим.

К э б о т (*даҳшатда тисарилаб*). Мастмисан... ё жинни бўлиб қолдингми?

А б б и (*бошини кўтаради; кўзларига қараб, баланд овоз билан*). Айтаяпман-ку — ўлдириб қўйдим. Бўғиб ўлдиридим. Бор, ишонмасанг, чиқиб қара.

К э б о т (*ишониб-ишонмай қараб туради-да, бир зумда тепага чиқиб, беланчакка отилади, болани ушлаб кўради. Даҳшат ичида бешикдан четланади.*) Ёраб!.. Ё тангрим! (*Оёгини зўрга судраб, қоқина-сурина хонадан чиқади, ошхонага тушади. Ҳали ҳам ҳушини ийғиб ололгани ийқ. Аббига яқинлашиб, хирқироқ овоз билан.*) Нега бундай қилдинг?

(Жимлик.)

(*Елкасидан ушлаб, қўйол силтайди.*) Сендан сўрайяпман — нега бундай қилдинг? Яхшиликча айтасанми ёки...

А б б и (*сакраб туриб, ғазаб ва алам билан уни итариб юборади, чол анча нарига тисарилиб кетади; овозида нафрат ва ғазаб*). Қўлингни теккизма мен-

га. Болани сүраб нима қиласан, нима ҳаққинг бор? Сеники эмас у, уқдингми? Келиб-келиб сендан бола туғармидим! Ундан кўра бўғилиб ўлганим маъқул эмасми?.. Сендан ҳамиша нафратланаман, кўргани кўзим йўқ. Эсим бўлса, гўдакни қўйиб, сени бўғизламайманми! Йўқол, башарангга қарай олмайман. Мен Эбинни севаман. Ҳа, Эбинни! Биринчи кўрган кунимдан буён! Бола ҳам уники, ундан түкқанман, тушундингми?

Кэбот (*калтаклангандан баттар, даҳшатда унга тикилиб туради; анча жимликдан кейин, зўрга сўз топиб*). Ҳали шунаقا дегин... Кўксимни эзид турган... қоронги бурчакларда судралиб, қайрагочлар шовуллашида яширинган фашлик шу экан-да!.. Сен бўлсанг — ёлғон, турган-битганинг ёлғон... икки-қатман деб ўзингни мендан олиб қочиб юрардинг. (*Энди ҳамма нарсага лоқайд.*) У — ўлик. Тамом. Кўрдим, у — ўлик. Шўрлик нораста! (*Кўз ёшлари юзидан оқиб тушади.*)

Абби (*телбанамо*). Йиглама! Йиглама деяпман! (*Хўнграб юборади.*)

Кэбот (*сал ўзига келиб, қаддини тиклайди, юзида шиддат; тишини қисиб*). Мен ақлдан озмаслик учун тошга айланишим керак. (*Ўзини тутиб.*) Агар бола... Эбиндан бўлса, ўлганига ҳам хурсандман. Гумонсираб юрардим... Қандайдир ифлос бир ножӯйликни сезардим. Уй совуқ туюлар, ёлғизлик эзар эди мени... Бошқа жой тополмай молхонага кирадим, сигирлар ёнига. Ҳа, гумонсирадим. Хурсанд бўлма, мени жуда ҳам аҳмоқ қилолганинг йўқ: сезиб юрардим. (*Хотинга қараб, масҳараомуз тиржаяди.*) Демак, эсинг бўлса, болани эмас, мени ўлдирган бўлардинг, шундайми? Овора бўласан, мен юзга кираман деб қўйганман. Сени осишади. Мен эса яшайман. Худо ҳам, қонун ҳам шуни талаб қилади. Мен полицияга кетдим. (*Эшикка қадам қўяди.*)

Абби (*бефарқ*). Ўзингни уринтирма. Эбин кетган полицияга.

Кэбот (*ҳайрон*). Эбин?

Абби. Ҳа.

Кэбот. Полицияга-я?

Абби. Ҳа.

Кэбот (*ўйлаб*). Ҳай, мени бу ташвишдан ҳам кутқазибди, бўлмаса ишимга борай. (*Остонада қайрилиб қараб.*) У менинг ўғлим бўлиши керак эди, Абби. Сен мени яхши кўришинг керак эди. Мен — сенинг эрингман. Мени севганингда — полицияга югурмас эдим. Ҳар қандай жиноят қилсанг ҳам.

Абби (*Эбинни ҳимоя қилиб*). Эбин полицияга югурган бўлса, демак ўз сабаблари бор.

Кэбот (*қуруқ*). Майли, сенингча бўлсин! (*Ошхонадан чиқади, дарвозага яқинлашади, тўхтаб, осмонга кўз ташлайди. Дармонсизлиги сезилади, у жуда қари ва ҳорғин кўринади. Изтиробда тўнгиллади.*) Ё худовандои карим, ёлғизлик менга ҳеч қачон бу қадар азоб берган эмас! (*Чандан оёқ товушини эшишиб, ҳушини йигади.*)

Дарвозадан югуриб Эбин киради. У ҳансираган, телбадай атрофга аланглайди.

(Елкасидан ушлаб.) Полицияга етказдингми?

Эбин (*бош иргаб*). Ҳа.

Кэбот (*Эбинни ерга улоқтириб, нафратли заҳарханда билан*). Шиллик-курт! (*Хоҳолаб молхонага юради, кейин қайрилиб, таҳдид билан.*) Уни полиция олиб кетганидан кейин, ўзинг ҳам жўна — тўрт томонинг қибла! Дарров йўқол, акс ҳолда, худо кўрсатмасин, кўп ўтмай мени ҳам қотил сифатида олиб кетишлиари бор! (*Кетади.*)

Эбин (*ўрнидан сапишиб туриб, уйга югуради. Ошхонага отилиб кириб, Аббининг оёғига ийқилади*). Кечир мени! Кечир!

Абби (*қувониб*). Эбин! (*Уни ўпади, бошини бағрига босади.*)

Эбин. Мен сени яхши кўраман. Кечир мени.

А б б и (эгилиб, телбадай ўпа бошлайди). Шу сўзларинг учун ҳамма гуноҳларингдан кечишга тайёрман.

Э б и н (изтиробда). Лекин мен полицияга айтдим. Ҳозир сени олгани келишади.

А б б и . Энди мен ҳеч нарсадан қўрқмайман.

Э б и н . Полиция бошлиғи ухлаб ётган экан, уйғотиб, ҳаммасини айтиб бердим. «Ҳовлида сабр қил, ҳозир кийинаман», деди. Мен кутиб турибман-у, нуқул сени ўйлайман, юрагим ёрилиб кетай деди. Тушундимки, фақат сени севар эканман. Энди ҳамма вақт фақат сени дейман.

А б б и (бошини силаб, меҳр билан). Тентагим...

Э б и н . Кейин орқамга қараб югурдим. Далалар оша... Шунда хаёлимга келди... Абби, ҳали вақтимиз бор. Қочсак улгурдимиз...

А б б и (бош чайқаб). Йўқ, Эбин. Мен қочмайман. Гуноҳимга яраша жазо тортишим керак.

Э б и н . Бўлмаса, мен ҳам сен билан.

А б б и . Ахир сен жиноят қилмагансан-ку.

Э б и н . Йўқ, аслида ният мендан чиққан. У ўлақолсайди, деб аввал мен айтдим. Шу сенга турткى бўлган.

А б б и . Йўқ, Эбин. Ҳаммасини ёлғиз ўзим қилдим.

Э б и н . Мен ҳам айборман. Агар биз гуноҳ қилмаганимизда...

А б б и (худога тик ғапиргандай, бошини кўтариб). Мен буни гуноҳ деб ҳисобламайман. Бунинг учун мен худодан кечирим ҳам сўрамайман.

Э б и н . Мен ҳам... лекин иккимизнинг биргаликда қилган гуноҳимиз қотилликка олиб келди. Демак, мен ҳам айборман. Полицияга шундай деб айтаман. Агар сен инкор қиласиган бўлсанг, улар барибир менга ишонишади, чунки улар биздан ҳамиша гумонсираб юришган. Аслида, чиндан ҳам ният мендан чиққан эди.

А б б и (бошини унинг кўксига қўйиб, йиғлайди). Йўқ. Мен сенинг азоб тортишингни истамайман!

Э б и н . Мен ҳам гуноҳимни ювишим керак. Озодликда қолсам, мен баттар қийналаман. Кечаю кундуз сени ўйлаб азоб чекаман. Мен сенинг... (*Овозвини пасайтириб.*) Оламда йўқдигингни билатуриб қандай яшайман ахир? Қандай яшайман? Ўликми — тирикми, жаннатдами — жаҳаннамдами, барибир, фақат сен билан бирга бўламан. (*Кўзларига қарайди, жилмайшига уринади.*) Жазони сен билан тенг тортмасам, ёлғизлик барибир мени ҳалок қиласиди.

А б б и (энди сал ён беради). Бунга рози бўлолмайман, Эбин, рози бўлмайман.

Э б и н (ўпади, эркалаб). Бу сенга ёрдам бермайди. Бу гал мен енгиб чиқдим.

А б б и (заиф жилмайиб, меҳр билан). Мен сени енгмоқчи ҳам эмасдим.

Э б и н (қулоқ солади). Эшитяпсанми?.. Бизни олгани келишяпти.

А б б и . Йўқ, бу менга таниш шарпа. Нима деса ҳам, индамай туравер. Пачакилашмаймиз, мен ҳам жим тураман.

К э б о т киради. Жуда ҳаяжонда. Эбин Абби олдида ҳамон тиз чўкиб турибди, Эбин уни кучоқлаган, қимир этмайдилар.

К э б о т (аввал индамай уларга қараб туради, кейин қасоскорона). Қотиллар, зап қовушибсан-ку! Беозор мусичадек кукулашяпсанми? Иккалангни бир бутоққа осиб, ўликларингни саратонда тебратиб қўйиш керак, токи ёлғизликдан қочиб қутуламан деб ният қилган мендай қари аҳмоқларга ибрат бўлсин. Ўз ҳирсига эрк берган баъзи мишиқи ёшлар ҳам кўриб қўйсин. (*Паузза. Юзлари тортишиб, кўзлари ножсўя аланглайди. Бир оз телбанамо кўринади.*) Бугун ишга қўл бормаяпти. Ҳафсала йўқ. Фермани ташлаб кетсамми деб

турибман. Ер ютмайдими! Молларни далага ҳайдавордим — яйраб юраверсин. Улар озод — мен ҳам озод. Бугуноқ бош олиб кетаман. Далаларни худога топширидим, токи бирор фойдаланмасин. Калифорнияга, Симеон билан Питер ёнига жўнайман. Аҳмоқ бўлса ҳам, ўзимнинг болаларим. Уччала Кэбот бир бўлиб, Сулаймон пайғамбарнинг хазинасини излаб топамиз. Мана, пулим бор! (*Тиззалаб, қачондир пул яширган жойда полнинг таҳтасини қайриади.*) Қаердалигини билганингда сенлар бу пулни қўярмидинг! Билмагансан-да. Мана — пуллар. (*Кўл солади, тополмайди, яна қидиради. Оғир жимлик чўкади.*) Кэбот полда ўтириб қолади, ўлик балиқ кўзларидай хира қорачиқларини Эбинга қадайди, газабдан нафаси тиқиласди, ҳушини ўйқотаётгандай қалтираб, зўрга нафас олади— ниҳоят зўраки хунук илжайиб.) Хўш, демак, пулни ҳам ўғирланган экансанлар-да?

Эб ин (босик). Бу пулларга мен акаларимнинг улушини сотиб олиб, йўлга билет олиб берганман.

Кэбот (захар сочиб). Э-ха! (*Сал ўзига келабошлайди, аста оёққа туради.*) Сен эмас, худо берган уларга бу пулни. Калифорнияда, эҳтимол, олтин тошиш осондир, лекин у худонинг давлати эмас. У менга тўғри келмайди. Менга яна гойибдан овоз келяпти. Шу ерда қол ва қаттиққўл бўл, деягти у менга. Сенинг пул ўғирлашинг ҳам худо амри билан бўлган — мени гуноҳлардан асраш учун! Бу ерда мен худойимнинг паноҳидаман. (*Пауза. Гамгин.*) Ҳеч қачон ўзимни бу қадар ёлғиз сезмаган эдим, ё раббий, қариб қолдим.

Чапдан полиция бошлиги пайдо бўлали, ёнида яна икки киши.

Полиция бошлиғи. Қонун ҳурмати — очинглар!

Кэбот. Сенларни олгани келишди. (*Эшик очгани чиқади.*) Кел, Жимми. Мана, иккаласи ҳам шу ерда.

(*Бошлиқ ошхонага киради, қолгандари ташқарида туришади.*)

Эб ин (бирдан қичқириб). Мен ёлғон гапирдим, Жимми! Мен уларга ёрдам берганман, биз биргалашиб... Мени ҳам оласан!

Абби (сапчиб). Йўқ!..

Кэбот. Иккаласини ҳам ол! (*Эбинга ҳасад билан, қарийб завқланиб.*) Яша, азamat. Эркак деган шунаقا бўлади. (*Пауза.*) Мен борай, сигирлар узоққа кетиб улгурмагунча, қайтариб келиш керак. Хайр.

Эб ин. Хайр.

Абби. Хайр.

Кэбот ошхонадан чиқади, ҳовлига тушади, молхона томон юради.

Полиция бошлиғи (бир оз ўзини ўйқотиб). Юрдик бўлмаса.

Абби. Жиндек сабр қилинг. (*Эбин томонга қайрилиб.*) Эбин, мен сени яхши кўраман.

Эб ин. Мен сени яхши кўраман, Абби.

(*Улар ўшишадилар. Уч полициячи ўнгайсизланиб жилмаяди. Полиция бошлиғига бош иргаб.*) Энди юрсак бўлади. (*Аббининг қўлидан олади, ёнма-ён юриб ошхонадан чиқадилар.*) (*Полициячилар улар кетидан юради. Ҳовлига тушиб, дарвоза ёнида тўхтайдилар ва осмонга кўз соладилар.*) Қуёш чиқяпти. Чиройлилигини қара!

Абби. Ҳа.

Полиция бошлиғи (қайрилиб уйга қарайди; ўз ийлдошларига). Яхши қўргон экан! Фермамисан ферма! Сотишса йўқ демасдим.

Парда

Асқад МУХТАР
таржимаси